



泉州府志

ル 5
1213
8





Faint vertical text on the left page, likely bleed-through from the reverse side. The characters are difficult to decipher but appear to be arranged in columns.

門凡五
1213
8

泉州府志卷十七

人物志中之上

列傳



柯述字仲常南安人父慶文第進士終屯田員外郎述與弟述迪嘗贄文見蔡襄襄異之未幾相繼登第述嘉祐四年進士初尉贛縣獲劫盜皆重辟乃損賊以就次賞知歸安脩水田蓄洩之利移知襄邑盜悉奔他境神宗聞之召對便殿盜意述代去復竊發下吏治得所以乘間之狀上益嘉嘆書其姓名于屏擢知懷州累官至朝議大夫直龍圖

閣述嘗倅漳賑饑有惠政有異鵲二巢于廳事之棟秩滿移居傳舍鵲亦隨止暨歸飛翔數十里喧噪彷徨不忍去蘇軾詩以記其異通貫百家詩史尤粹於易著否泰十有八卦以明進退君子小人之義以名一家晚徇邦人之志還州庠于舊址士類德之祠于學

柯知彰字仲晦述從子也祖昉以學行稱由南安徙居晉江大觀初郡以不求聞達薦召赴闕命下而卒知彰擢紹興十年進士為海豐令浚靈溪陂溉田三千餘頃民懷之終通判福州子汪洪俱見

選舉志

莊公岳惠安人嘉祐四年進士歷秘書丞終吏部侍郎久任刺舉所至稱治元祐初上疏極言時事璽書褒答有顧惟忠蓋深所嘆嘉之語

謝季成字子立晉江人父微職方郎中季成以廕歷大理評事衛尉丞熙寧中累遷內藏庫使知宜廉融邕四州廣西鈐轄峒蠻侵叛悉討平之合浦築城浚隍備禦之具為一路最邕筦外寨戍兵歲物故常千餘請以峒丁伐戍而教之不失備且可救死亡咸以為便元祐中卒于官邕人廟祀之號

清戎將軍

黃公懋德化人三舍法行升于州公懋不喜王氏三經字說退隱不仕讀書著述自知死之年月至期盥櫛正衣冠而逝

宋直方字順中晉江人熙寧三年進士知鞏縣鞏有橋水歲敗之直方令父老䟽橋柱以殺水怒益伐石爲隄役成一邑以爲利使者以率斂劾直方移知王屋性簡素雅好山水之勝至王屋即召家人曰吾某日當爲物外之遊至期盥洗正坐而歿林知字子默晉江之馬坪人閩將仁翰之裔孫也

隱居篤學有志尚築室靈源山之巔人鮮見之熙寧間嘗詣闕上書論時政久不報在京時惠安簿林迥訪其書室題壁間曰先生平昔命何非萬卷詩書一布衣回首長安成底事吳山蒼翠幾時歸知遂歸隱不出縣南有烟浦埭衝決久廢知修以利民里人德之爲立祠

林外字豈塵知孫也工詩詞遊大學嘗題吳江垂虹亭人以爲不食烟火語紹興三十年第進士止興化令所著有嬾窠類稿

林黃中字伯玉晉江人父臯治平中進士調建州

理椽雪活獄囚註誤不受賞格黃中元豐八年進士調永豐尉儒有張生者貧負租黃中密以俸代其輸張生未幾擢第遷歸善令有院僧與豪民爭田各持嘉祐契券界至歲月皆同先後令不能決黃中遣吏取架閣文字嘉祐年者審之紙札與僧契同豪民伏辜知彭城彭城號盜區訟藪黃中治甫半年獄空幾兩月部使者以聞傳宣獎諭林棐字彥忱同安人元豐八年進士嘗判沂州以行河勞賞驟遷郡守部使者擢大府少卿有詩文行于世

王公濟字經國晉江人年十八登元祐六年進士歷知温州瑞安縣時方臘攻浙東諸邑掠黃岩樂清直趨縣境欲遂窺閩中公濟召邑豪及父老諭之棟丁壯得五千人朝夕肄習公濟與尉梁公範躬擐甲胄九十餘日不入廨舍民樂爲之死賊至不能動最後悉衆以來公濟先募士繡大旗爲福建路槍杖手字旣陳張旗賊望見以爲援兵至大驚即引退賊平公濟代還以疾卒有司上其功官一子瑞安聞公濟死市哭累日立廟祠之徐師仁爲之傳而贊之曰公濟以小邑嬰賊鋒誓以死守

雖張巡劉昌輩何以遠過閩不被兵公濟力也

劉驥字德稱晉江人父鎡紹聖元年進士驥篤學尤好老氏書嘗病後學離章析義乃爲講解自序其說大畧謂道德五千言未嘗分章後人分上下卷以象兩儀之妙用八十一章以象太陽之極數今復通而爲一以論之名曰老子通論父鎡廕補仕至欽州守子敏求

劉敏求字好古紹興中爲大理寺評事面對言比年監司郡守有以一章而舉二人甚至三四人前所舉者未用後來求者復舉之名曰改舉黷害風

教乞申嚴法禁無故而改重寘以法從之累遷刑部侍郎明律令刊定新書平治大獄皆有始末以秘閣脩撰知南劔治行尤異改臨漳卒于官

黃冠字元功晉江人與兄允允俱有才名鄉里爲之語曰清源熿熿邑有三黃試福建漕及太學皆魁選元祐六年第進士晚仕于朝充棣華宅諸王府教授判監嘗積俸資百金曰吾將買田歸老一夕盜揭篋去人爲惋惜冠笑曰是亦羽化耳不復問歸寄僧舍貧甚葺簾布幙圖史左右無長物以詩酒自娛與李邴往來酬唱爲多卒年八十七邴

銘其墓允特奏補官有龜峰集

丘崇字執禮晉江人工詩文尤精天文象數之學嘗侍父官惠之河源時蘇軾謫居於惠崇因得聞其餘論而李邴亦嘗與之唱和有遺稿六帙

陳詳晉江人年十八登紹聖四年進士爲南劍州推官尚書黃裳妻以女未幾女亡裳故挈其裝歸以觀其趣詳不爲意乃反之仍歸以娣與張讀同年進士讀題其里曰通籍

陳研字叔幾詳從姪乾道二年進士官臨汀上疏乞弛鹽禁且請置寨柳陽團以備鹽盜詔從之權

貴欲引爲御史先諷之排擊故相研曰公議不可犯故相不可彈以忤去提點湖南刑獄永有富家人被人毆死官吏利其賄反抑死者家爲誣獄上研平反之徙計度轉運使屬州故有鐵纜錢隸馬民病之研曰今無用鐵纜而折直未除何也悉去之遷起居郎卒研有經學詩書易禮皆有解

蘇伯材字延構晉江人紹聖四年進士知潮陽有富民殺其姪女懼而賄吏爲密懷黃金三十斤置伯材所具言求毋入狀伯材立械治之籍金于官辭連縣佐按之擢知韶州憲司吏誣執翁源民爲

盜以倖賞因賂縣官梁格使就獄殺之伯材廉其事疏論格坐黥海島其廉正類此有文集周易解義三十卷藏于家從兄珍玠子松俱登進士第松與東坡唱和有文集一編

傅惟肖字應求南安人紹聖四年進士知清江縣屬歲歉發倉賑濟饑民赴糴攘奪之巡尉希賞欲以強盜論惟肖笑曰迹則似矣顧未嘗結徒操兵柰何加以重辟由是全活者衆終岳州通判惟肖子倘爲潮州錄叅蠲上供耗銀民德之知肇慶府南山有紫石可爲硯屬縣以石工占胥無慮數十

倘悉斥去之

張讀字聖行安溪人遊太學元祐初幸學恩諉免省自陳不願受紹聖四年以上舍生擢第調潁昌府法曹參軍范純禮爲守器重之除編修國朝會要以父年逾九十求便親通判本州後除諸王府直講未幾請郡自效知興化軍時靖康初國步多艱士卒驕恣一日謹趨庭下乞額外給賜讀正色叱之諭以禍福諸卒感服反告其渠魁即梟首于市一郡肅然建炎初被召以疾辭奉祠家居杜門卻掃里人矜式焉性至孝居喪廬墓蔬食終制所

交皆天下士與陳瑩中友善既從仕爲趙清獻所知獎後與李方叔端叔爲蘇黃門客子由作東坡墓銘獨以示讀讀曰斯文妙盡東坡平生政恐仇人復藉此媒孽不若刮磨之爲愈使東坡無此銘萬世之下其不蜚聲騰實乎子由深然之後徙居晉江與李邴過從尤厚善屬文閩中碑碣多出其手貲入即分親故之貧者家無贏餘其卒也李以詩哭之有累日塵生甑經年肘見衿之語壽_{十八}王炳字景文南安人紹聖四年進士娶呂惠卿猶子避呂十年不調中爲沐陽令秩滿入京蔡京當

國以不往見左授海陵丞後附京者皆謫炳獨全歷官知汀州奉祠卒孫侃

王侃字仲和歷官肇慶糾曹時倅王衣俘商人數百名以盜分囹錮之將以爲功侃持不可倅適攝郡督成愈急同僚以危言怵之侃曰吾守職耳他非所憂也會移獄五羊帥親鞫得實破械釋之後歷官倅三山未拜命卒子顯世

王顯世字子翼以廕補興化錄事叅軍有從官起家守泉與鄉士爭田囑使爲地顯世不可奪以歸士一郡稱快受輪卻斛面不取同列爲寄倉將更

吏以數上顯世不願給云歸當取之吏白一去此
不可得笑曰吾不可得子孫不可得耶終身未嘗
干薦真西山目以德行之士改秩去寧都縣卒顯
世書無不讀以詩名大篇尤婉麗奇古有容安摘
藁十卷

韓謹字去華晉江人崇寧二年進士調南海尉以
捕盜賞改宣議郎除處州教授著詩禮義解上之
辟龐長貳稱獎援之朝召為國子博士改除廣南
東路提舉學事自巡尉未再暮擁使節一方前未
有也罷歸以所著義禮數篇見當路時朝廷大開

禮制即日除編類御筆所編類官兼禮制檢討官
一日抗章謝事誥及門家人訝不素告謹曰告則
事不成矣同僚劾奏請留朝廷還以舊職未

就

黃登字君陟晉江人少遊上庠與陳覺民有研席
之好且三十年及陳守泉涉兩歲登未嘗干以私
既卒陳以文誄之張讀不苟許可亦以隱君子目
之

儲敦叙字彥倫晉江人崇寧五年第進士丞漳州
龍溪宰福州寧德皆有惠政民為立祠性閑退奉
祠館十年通判賀州秩滿復請祠居里徧觀佛書

多即高僧遊與李邴相友善歷官三十餘年屋廬
田畝不增于舊有詩文號玉泉集

江常字少明晉江人崇寧五年進士累官給事中
帥福州建州賊乘流趨福州城常登陴呼其酋諭
以禍福賊羅拜城下遁去靖康以後州卒驕橫謹
趨牙門常蹤跡得其尤黠者付保伍因事去之士
始識紀律尋奉祠歸晚益薄榮利歲饑倒廩賑濟
父喪廬墓以壽終有外制十卷文集二十卷

陳康年字季昌晉江人政和壬辰舍選知海陽潮
陽二縣捐俸以貸逋賦運私穀賑饑民當路交薦

通判潮州攝州事黎寇犯境嚴備卻之歷官二紀
公廉如一日云孫謙淳熙中登第爲興化軍教授

楊友晉江人政和二年武舉及第歷官知欽州先
是交趾與前守爭鹽利謀舉兵友至遣使通好宴
交使于天涯亭賦詩友賡韻云可憐鱗細閑驚躍
誤把新蟬作釣鈞交使嘆誦謀遂寢知廉州故事
貢珠令民採取多溺死者友市於他州以充貢所
得恩澤先奏三兄子各一人云

徐瞻字德望晉江人少由三舍貢辟雍擢政和五
年第歷理官三任知海陽政平恕通判廣州臺閩

交薦當得州同年秦檜當國志其不求已不與坐
是不調杜門十五年觴詠自適守周葵表其里曰
興德取治獄多陰德子孫必興之義從孫挺伯嵩
履正俱見選舉志

徐光實字德克瞻從弟登建炎三年第嘗知海鹽
縣歲旦放獄囚歸省吏白恐亡去爲累曰我以誠
遣彼必不以僞應囚感激如期皆至知英州受代
以月五日郡例新舊守並支俸光實謂已替則不
事其事辭不受徙連州嶺表少廉吏光實一介不
取曰吾以是娛親也卒年六十二

徐明叔字伯晦伯嵩子也紹定五年第進士辟江
淮制幕秩滿幹辦廣漕清節益勵除太學錄通判
漳州以廉聞知英德府徃寇不敢犯召爲國子監
丞潮寇起命知潮州設購捕渠魁戮之除直秘閣
江右憲歲歉發義倉以賑郡民遷戶部侍郎改兵
部侍郎會元兵南下憂憤卒明叔學有源委與洪
天錫齊名人稱之曰擇齋先生

石晉老字子明晉江人政和進士倪之孫倪爲清
白吏晉老以先人之貲產盡遜其兄居鄉敦讓一
語不欺傅康稱爲篤行君子

溫革字叔皮惠安人政和五年進士初名豫後耻與僞齊劉豫同改今名歷官秘書郎紹興初被命使河南修山陵歸奏以實語甚憤激上爲泣下忤秦檜意出守延平刊五嶽真形圖于郡治復守臨漳甚得民譽終福建轉運使

吳達老字信遇初名天經惠安人政和五年第進士丞建昌日朝廷更鹺法達老與令謀如此則鹺商重困堅執不行曰雖得重罪無害申軍乞奏未報間朝廷覺而罷之後知惠州有承節郎謝革者遣亮徒劫掠仇家又殺其主焚所居室獄具達老

慮賊黨奪囚先處革以極刑乃自効待罪有子七人兩遇郊霈先奏薦弟迪老述老其弟以兄多子未霑命爲辭達老曰一官不足爲吾弟榮聊以慰母心耳母年八十餘三奉祠侍養不出後改知潮州卒子官子延賞者二人

黃馭字公碩南安人居父喪芝產于靈堂前其葉累百重和元年進士調崇安尉有鄭主簿者貧不妄取卒于官馭傾囊以賙其行人皆義之終南劍

州通判

王寘字季達遊太學大觀初蔡京當國寘與同舍

生陳朝老等上書言之坐遷自訟齋十餘年宣和三年以特奏名補官嘗有詩云耕田博飯未爲辱爲米折腰真可憐高卧北窓風颯至更於何處覓神僊

蘇欽字伯承德化人宣和中第進士除江西帥屬
韞卒叛爲帥漕畫策平之知巴州舊例有脚乘三千緡悉以代民輸賦移閬州首陳州之利病六事復却例錢互送錢諸司以治最薦得旨再任未幾除利州路轉運判官又條時政五事上之卒于成都

王凱字和中晉江人號虛凝居士有詩集嘗應八行舉東壟先生徐師仁以書與齊亨仲論其爲人曰凱年踰四十履行無玷事父母篤孝居喪廬於墓者三年猶不忍去與其弟相友未嘗一日離雖至貧苦凡衣食之具不肯取他人求之流輩未易多得嘗題桐廬釣臺人傳誦之號曰王釣臺云
林願壽字表世晉江人事祖父母父母以孝聞祖母楊嘗苦背瘍潰爛徑數寸願壽曰敗膿在中寢蝕旁肉若放拭則不堪痛楚俟其熟寐潛舐去傳藥而愈廬父墓有芝產之瑞事繼母彌謹繼母卒

廬墓有白鵲數十往來墓上人以為孝感他行稱是博覽經史尤喜作大字郡守陸藻稱之曰真博物君子也

趙不慮字子容宋太宗六世孫紹興移蹕屬籍南外宗正寺遂為晉江人補率府率積階刺史知南外宗正事訓淑宗黨寬嚴中劑檢捉自其子弟始弗率者皆畏悼之無敢干以私復知西外奉祠終弟不慢

趙不慢字子履授率府率姿範魁岸進退有度孝宗目為宗室魁表嘗副諸葛廷瑞使金虜爭禮服

不屈還遷榮州刺史嘉泰辛酉京城災逼其居不屈亟與兄弟奔衛太廟火幾半都城而所居獨免進眉州防禦使奉祠卒不慢能詩樂府尤長和古今梅詞千首

趙善謚字寧甫太宗六世孫淳熙進士知仁和縣治辯有能聲除軍器監簿有厄之者改提轄摧貨務以言者得祠卒弟善謚以文稱與善謚俱省試第一守典宗表其居曰襲魁歷官治行可紀循永二州卒

趙伯暹字致遠太祖七世孫乾道五年進士知瑞

金縣以大臣薦知南恩州下車蠲積逋爲緡錢萬
乞減額丁米寬民力改德慶府立貢闈修郡庠提
點廣西刑獄移廣東轉運知漳州蠲鬻鹽宿負以
羨錢造浮梁便行者知西外宗正寺卒

趙汝倣字唐卿太宗八世孫紹興初與父善新弟
汝僖同第進士郡守表其里曰三秀善新爲封州
倣汝倣通判德慶府築隄障晉康江亘三十里先
是瀕江之田數淫於滂至是爲上腴知賓州築城
覆之以屋鑿七井城中以免江汲民便之提舉廣
東市舶遷提舉常平茶鹽

趙汝侉字臺卿太宗八世孫先以父任遜其季季
尋天復與其兄子後登嘉定四年進士端平初除
知鬱休州陞對言國家頻年多厄乞謹德脩政以
弭災召和時謂得宗臣進言體將行改韶州治以
平易卒汝侉爲人清曠托僧廬以居子彪彪霏俱
見選舉志

趙師璉字德玉太祖八世孫淳熙二年進士知古
田縣通判汀州上杭峒酋結連他峒叛尅日齊發
師璉廉知伏卒峒口俟其出一戰擒其酋郡賴以
安民感而祀之知德慶府卒

趙時煥字元晦魏王九世孫幼有俊譽嘉定十二年進士授侯官尉有能聲再調長溪姦惡悉奔他境號神明尉辟湖湘帥幕官一夕訛傳北兵至官民恟恟欲潰時煥治文書自如留同幕飲人心以安累遷太常寺簿以攻史嵩之爲其黨所忌出知撫州州軍素悍小不懽輒叫呶有卒剽人于貨執而戮之迄代去無敢譁者提舉江西常平命下軍民相慶除廣東運判革重稅懲汙吏聞者悚息卒于官

趙必羣字伯暉太宗十世孫補承務郎悵望中原

懷古賦詩慨然有祖述之志從益王王永嘉轉承議郎貳趙吉甫南外宗正益王即位福州泉招撫使蒲壽庚叛與州司馬田真子謀降元必羣逃竄竈村真子遣兵勒還草降表必羣持匕首自刺吉甫抱哭曰我愧死萬萬不能復見子矣張世傑回兵圍城壽庚盡殺宗室縛必羣將斬之錄曹參軍吳伯厚計出之後遂居泉之東陵日與漁樵方外士班荆燕坐不復問人間事諸生請講解經傳疊疊不倦尤長於典禮以壽卒有茹芝東陵等集傳于世宗室又有必辭者福州長樂縣主簿宋亡不

仕易名文孫不接流俗專以訓誨爲事又有必暉亦宗室與傳定保爲友其文章議論淵懿浩溥爲閩南碩儒

黃豐字元式永春人建炎二年進士靖康中虜犯京闕搜括中朝名士焚燒太學首問國錄黃豐安在因趨井避之後除編修知興化軍三山黃瑀聞太學錄黃豐武學錄陳謐俱永春人意必人才所鍾之地欣然來宰是邑其爲人所重如此蘇升字時仲永春人紹興戊辰進士與朱子同年性好詩評者謂其大槩類陶靖節有願齋集行于

世嘗宰吉之永豐興學教士作人之功居多姪奉亦登壬戌進士第

楊世永晉江人紹興五年以特奏名爲端溪尉寇駱科犯郡境世永貫褚鎧佩兩刃跨羸馬獨出伍長扶其徒曰汝輩不可負官人相率以從行二舍許遇賊戰死兵皆號哭死戰無生還者詔褒其義勇加承務郎官其一子後真德秀書義烈二字表其墓

楊夢齡字子壽世永子父死時年十四憲臺以侍父當錄夢齡詣部乞改奏兄迄如其志後登紹興

二十七年進士調瑞安丞攝縣事歲疫聚食病者千餘于僧寺捐俸資爲藥粥日親察視悉賴以活開復塞河數百里後邑宰藉以冒賞夢齡終不言宰平陽屬河患捐俸錢五十萬首其事修斗門壅之役成民爲生祠秩滿當道交薦欲處以六察俄卒于旅舍邑人聞之罷市哭哀金入都扶護以歸楊炳字若晦世永孫少力學精左氏淳熙二年進士當道薦爲國子監錄召試三館累遷左司諫論治賊吏常自大吏始又乞搏宮中浮費椿之別庫嘗曰大臣不爲私則小臣不敢干以私臺諫不爲

私而後可責人以私累遷權吏部尚書時邊釁寢開與鄧友龍異議遂丐外疏用兵之害開禧三年除寶謨閣直學士奉祠卒年八十一爲文渾厚簡古有易說禮記解西掖類稿諫垣存稿雜著號儵溪居士子寅翁

楊寅翁字仁仲穎悟強記手不釋卷嘉定元年進士以親老奉祠十年爲文純麗豐贍應博學宏詞科擢真高等授宜黃令以大臣薦召命下而卒楊宏才字穉遷晉江人紹興五年進士調龍溪尉獲盜賞法應改秩不願就用薦者陞改累階朝奉

大夫晚年奉祠居里號嬾真居士卒年七十五有
覆瓿集一十卷

楊楸字楸之宏才子乾道二年進士知永福縣休
澣輒乘小車行阡陌訪民疾苦入提榷貨務以卒
初宏才官四十年殖產錢僅八十且以先廬遜其
弟及楸復以奩田遜弟眩鄉人義之弟中立字南
強知龍巖縣捐俸築南隄民賴其利楸之子字時
父峭直能文詞

林彬字彬之晉江人家世孝義彬蚤預薦以母老
不忍行時楊寅翁累請祠侍父郡守真德秀以溫

陵二孝目之凡鄉閭義舉彬皆爲之倡晚以一尉
終

吳岡字稚山初以辭賦預貢不第取所業焚之曰
是不足爲乃潛心經學擢第教授峽邵二州二州
僻陋人不知學岡治學舍以經學指授諸生始有
第春官者後官夷陵卒州人廟祀焉自號耐閑翁
有詩集六卷黃維之爲序子寅姪憲甄俱特奏補
官

許衍字平子同安人紹興二年以太學生伏闕上
書言事士論躓之明年上舍登第嘗進本論二十

篇言四民利害及上供銀攬戶之弊通判建寧府
未赴卒子伯誦以蔭入官知僊遊縣多惠政士民
稱之有便民錄數十條仕終通判福州

蔡茲字光烈永春人詞賦第紹興十二年進士仕
至南恩守秩滿雅有林泉之想梁相克家當軸除
茲廣憲控辭甚力遂掛冠歸築室東偏扁其堂曰
長春日與賓朋觴詠其間茲紹興二年嘗爲建州
貢院考官謂人曰吾取中一後生三篇策皆欲爲
朝廷措置大事他日必非尋常人乃朱熹也其巨
眼如此

陳知柔字體仁永春人性聰穎立志墳籍登紹興
十二年進士授台州判官郡獲海盜有被誣者獄
久弗決知柔辨釋四十餘人授教建州漳州兩奉
祠起知循州徙賀州知柔與秦檜子熺同榜檜當
軸時前列十餘人俱以攀援致通顯知柔獨不阿
附以故齟齬盛年從仕即動歸興自號休齋居士
雅好山水在天台奉安遍遊名山歸至會稽耽其
巖壑留二年罷賀州留惠陽三年暇日泛豐湖登
白鶴峯和東坡詩羅浮風物陶寫殆盡還叅福建
議幕前後四奉祠從學者衆寓居僧房四壁蕭然

遇名勝輒置酒賦詩相與談論經旨所著有易本
旨易大傳易圖春秋義例古學圖詩聲譜論語後
傳詩話梅青傳古賦雜著

陳樸字端行知柔猶子乾道三年進士爲江西運
司主管文字以薦入提轄左藏大理寺正知漳州
擢浮費五萬爲民代輸身丁提舉湖北常平召除
倉部以左司郎官接伴金使舟行大江中流風暴
作金使駭汗樸笑傲自若曰此天之所以限南北
者守疆息民順天則天福之江有神不可欺使悚
然擢太常卿除知廣州兼廣東安撫革弊例帑羨

溢受代儲錢數十萬上于朝子亞卿終知廉州直
卿知英德府弟機模

陳機字介行學問該貫尤長於詩寫情咏物若不
經思徃徃出人意表嘗有讀易詩云從此不除窓
外草要觀天地發生心又曰須信生生是真易踈
籬依舊竹生孫其深於經而語意之到如此

陳謨字中行材氣高邁貫穿經史登慶元二年進
士宰執以學行薦除國子正開禧初召試館職時
議開邊模對策謂王恢首謀之戮不足以贖僵尸
百萬之冤叅政李壁讀之嘆曰真館職也除秘書

省正字校書郎通判鎮江府平鹽鈔法公私俱便
知梅州多惠政民爲立祠改汀州民以綵旗迎于
界上有曰忻迎郵水新賢守知是梅陽舊使君居
五月卒號可軒門人多名士達官有經史管窺行
于世子晉接紹定壬辰進士仕國子司業宗正
陳景魏知柔從孫以郊恩補信州鉛山簿歷監贛
州會昌倉石城寇竊發景魏請乘機掩捕郡守然
其計破賊寨擒其酋餘黨悉平辟廣州新會丞改
知潮陽縣歲輸丁銀郡守督拘錠頭錢盡械邑
吏景魏曰吾寧以罪去決不阿奉貽害無窮守不

能奪由提轄文思院改知惠州郡有疑獄久弗決
景魏讞出之重正胥魁之罪惠經兵燬痛自搏節
起學宮官廨仍以餘力葺白鶴故居合江樓六如
亭歲大饑上言民瘼未瘳減惠陽糴米三之一擢
知潮州後知英德卒洪天錫狀其行謂其少不倨
老不惰病不昏化不怛信善人云

陳一新字又之永春人少受學陳知柔志行迥出
流輩登紹興元年進士條對剴切爲時所稱教授
汀州慶元四年較藝漕闡發策以谷永攻君而黨
王氏劉蕢言直而有司不取爲問同列請易之一

新堅執不聽果激韓侂胄怒將以爲罪侍臣力救
得免累遷國子博士輪對深論權倖以劾免通判
婺州知邵武軍却互送簡供餽以廉平稱卒于官
初言者請下漕官索考官不習僞學狀一新曰吾
寧不爲考官决不書也其守義如此

陳光字世德永春人下帷讀書手不釋卷梁文靖
嘗從受業登紹興十八年進士第與朱子同年手
抄六經解一字差誤即燬版復抄其誠敬學問如
此尤工爲古文所居之山人以文章名之官封州
僉判權知新州

王識字致遠永春人博覽書傳尤精星曆嘗作渾
天圖以驗天文盈縮又作渾天儀陳知柔爲之刻
碑題跋一夕因觀星詞云一雨洗空閣象緯迫人
清披襟臺上坐細看北斗在璇衡知是南宮列宿
初出極星未遠龍角正分明河漢餘千里風露已
三更坐未久書帙散酒壺傾涼生殿閣冷然邀我
御風行擬欲乘槎一問但得天孫領畧安用訪君
平莫笑儒生事造化掌中生

陳豐字元齡晉江人紹興十八年進士豐少有文
名銓闈廣漕俱魁選兩試詞科提轄文思院會言

者計費輟造勅綾偽告日滋豐白起部謂所較者
小所害者大因請復舊弟登子并俱見選舉志登
字元龍有文名字畫尤精與王守十朋相友善
梁南一字力行晉江人紹興十八年進士居鄉講
授從游者衆有六經辨疑行於世

張元德德化人長於易以六十四卦再重爲易書
繇彖大小象爻辭繫辭說卦雜卦皆其自作筮法
以土作地盤匏爲天體中刻木八面畫八卦初撼
得之爲下卦再撼爲上卦視其爻辭吉凶皆驗
林扞字廷植晉江人紹興十八年進士調歸善尉

獲鹽盜十餘人白郡守請寬其罪不希賞格或諭
之扞曰吾爲官幸赤子無知以爲功忍哉初扞游
太學與林孝澤友善扞教授肇慶孝澤持節行部
不入官舍而館于學一日扞謂孝澤曰公宜他徙
毋重困我因出守貳已下書一束示之皆未啟緘
孝澤止啟手書予以薦牘翌日守持白金詣扞謝
扞驚曰何使君待我薄也守慙退始扞居里故人
爲舶屬來訪見扞一室蕭然惟案上圖書數軸從
容謂曰僊居海濱豈無可委諭者扞曰此言何爲
至我遂不復謁謝遷南恩州簽判卒于官

江致堯字聖俞五世祖仲筍國初說陳洪進納土
賜進士出身官至大理寺司直致堯好學尤用力
於經以特奏任法曹雖官務煩冗而丹鉛未嘗輒
去有周禮解詩集行世

王文獻晉江人嘗撰孝經詳解一卷紹興間投進
藏于秘府

王獻臣字賓虞惠安人有詩號卧龍翁集陳恭公
執中嘗過其家有王公杜陵老草堂枕溪碧之句
葉守廷珪序其詩謂其間佳句置唐人集中無辨
也

蔡熹字誠叟晉江人蚤有文名弱冠預鄉薦登紹
興二十一年進士尉莆田職事外篤於文學莆名
公皆與定交校文三山所選多名勝再調化州教
授諸上官競爲剡薦甫改秩而終姪次傳

次傳字崑肖淳祐元年知僊遊縣審爲政先後首
興學校作士氣增學廩勸農桑民深懷之以政蹟
聞累遷太常少卿

趙公迥字仲和晉江人紹興二十年進士調汀州
戶曹隆興御極郡卒忿支賞緩群譟譙門繫錄曹
某將加害公迥諭之曰貲與命孰重叛則爾誅貲

於何有姑歸營出知錄錢於我乎取衆始定錄雖
生還遭毆瀕殆公迥白守將梟倡亂者十餘州以
無事知邵武軍以留相薦召對知西外宗正事改
南外攝州事蒞政簡潔人不敢干以私移西外陞
直秘閣復轉外卒公迥貴達不肯治第居盤龍僧
舍晏如也兄公逮見選舉志以善樂府稱

柯宋英字子飛始居南安徙晉江紹興二十四年
進士教授四明除國子正遷本監簿力求外補知
梅州闢郡齋扁景程程名皎古隱君子以德行聞
訟者不質諸官而取正於程人思之與韓文公並

祠于學英至任滿獄無死囚人以德化不減於程
代還三奉祠館挂冠納祿杜門謝客州縣官稀識
其面初教授四明守王公十朋贈以詩有不予一
介將行李慨爲孤甥罄橐金之句鄉士無少長皆
以鄉先生稱之卒年八十六

王力行字近思同安人與陳易楊至履正劉鏡淳
熙間皆游朱文公門力行苦學善問深得其旨趣
所著有朱氏傳授支派圖

許升字順之同安人紹興二十一年朱文公主同
安簿董邑庠進秀民迪以義理之學升從游最蚤

天性恬澹無物累文公語錄載其問答之語爲多
文公去任復從游于建陽其學益進及卒文公深
惜之爲文以祭今配享于文公祠

陳易字俊之永春人從朱文公學文公嘗稱易及
陳淳爲學頗得蹊徑次第登慶元二年進士仕終
福州懷安丞居喪參酌古禮不用浮屠鄉間化之
所著有語孟解藏于家

楊至字至之晉江人以文學聲于時蔡元定竒之
以女妻焉所記有文公語錄二卷

楊履正字子順晉江人學得文公堂奧生徒恒數

百人

劉鏡字叔光惠安人厭科舉之習從朱文公學主
於涵養體察稱高第

蔡和字廷傑晉江人以親老不能從宋文公游勉
陳易往受業自以書從易請質無虛日居白石村
喪祭皆配古禮鄉間化之真西山守郡李果齋以
文公弟子佐幙議創書院于東湖延和爲堂長會
易鎮不果同時有陳淳安卿臨清人號北溪先生
問學諛貫文公有南來得一安卿之喜晚以特科
調官往來道泉學者勉留講授一時如鄭思忱思

永蘇思恭王次傳卓琮王雋黃以翼江與權黃必
昌皆從和與淳學先是郡士專經老泥章句業文
者競浮華析理者駕玄虛自文公道導其源白石北
溪濬其流條理明備講論平實繇是闕洛考亭之
書家誦人習理義之盛別爲紫陽別宗師友淵源
盖有自云思忱已別見

蘇思恭字欽甫晉江人嘉定戊辰禮部奏名候廷
對聞有暮喪亟歸辛未賜第思恭篤學踐履堅確時
然後言以理義之實教士莆陽士翕然變焉陳復
齋諸賢推重之又分教曲江南脫選而終所著有

省齋集

蘇思永字景修安溪人篤行朴粹白石

愛之妻以女俾從學終身有易說 王次傳字崑

父晉江人善講折指授生徒多貴顯再預薦不第

卓琮字廷瑞永春人從陳北溪游嗜學堅苦以

積累成功凡所講論能鬯北溪之旨 王雋字迪

甫精敏絕人館北溪于家授字義行于世 江與

權字亞良惠安人從學蔡白石及陳北溪爲文古

雅以右選入官兩預鄉貢 黃必昌字景父晉江

人從陳北溪學又切磋於陳復齋所著有大學講

稿登嘉定十年進士通判循州

呂大奎字圭叔同安人少學于陳北溪門人王昭
已復盡屏詞章專務理學登淳祐七年進士累官
吏部侍郎出知興化軍轉知漳州過家蒲壽庚降
元脇大奎署降表不從見殺所著書盡燬于賊惟
學易管見春秋或問易經集解行于世

黃巖孫字景傳惠安人寶祐四年進士授僊谿尉
興學校通水利建橋梁修邑志一以義理之學為
政咸淳間知尤溪縣新南溪書院建四齋及講堂
以棲學者復作夫子燕居堂初太極通書西銘三
書文公為之解後諸儒多有發揮而文公所與門

人問答書䟽錯出語類文集中者散而無統巖孫
乃本文公註解悉語類文集及諸儒之說申以已
意會粹成編倫類通貫名曰輯解刊于書院學者
便焉未幾通守福州又校刊西山讀書記

丘葵字吉甫同安人風度凝然如振鷺立鶴蚤有
志于考亭之學初從辛介甫繼從信州吳平甫授
春秋親炙呂大奎洪天錫之門最久宋末科舉廢
杜門刻志厲學不求人知所著有易解義書解詩
口義春秋通義四書日講經世書聲音既濟圖周
禮補亡號釣磯其居在海嶼中元時倭寇至其第

他無所犯惟取遺書以去故其著述多無傳者時
門人有呂椿

呂椿字之壽晉江人幼從丘鈞磯學書過目成誦
作文立就清貧徹骨授徒白給著春秋精義詩書
直解禮記解所爲詩自成一家

黃萬頃字景度同安人紹興二十七年進士知雷
州陞對言馬政甚悉上嘉嘆改知廉州秩滿知瓊
州從宦四十年不植畝田椽屋仕纔起輒仆視之
恬然所著詩文數百篇又集古今詩話爲筆苑五
卷

黃適字德夫晉江人以詞賦稱紹興二十七年第
進士治廣州東莞縣不苛而辦帥意縣有餘藏會
適謁府遣椽襲其賦椽奉意指籍常賦爲贏以獻
他日府責賦適報椽已輸矣府豈欲令再歛耶即
文移數十訖無以償而止帥因薦公治狀籍記中
書秩滿守新州

諸葛廷瑞字麟之南安人紹興二十七年進士調
漳龍溪尉改知崇安縣以政績聞擢主管官告院
奏對稱旨孝宗嘉之顧謂曰卿人材磊落議論正
直當爲國家立事即日擢起居舍人光宗嗣位首

進司馬光仁明武之說且曰三者宜行之以久終之以不倦時潛邸舊僚有因干政黜外者廷瑞懼其復入復援李絳吐突承瓘事以進詞意鯁切人以為難金人有大喪命廷瑞克弔祭使其入境弔祭之禮皆請旨以行至虜境虜伴使以三節人衣帶服飾為非請易之爭辯甚厲廷瑞徐折之不為動虜不能奪為之加禮使還光宗獎諭命兼權吏部侍郎進起居郎疏言兩淮藩籬不固法禁不嚴乞詔侍從臺諫於文武臣中各舉所知可為沿邊監司郡守一二人者以待選用令照例上殿庶可

詢其材能事付三省施行紹熙元年兼權中書舍人未幾御札命為真以與左相留正有連累章求避改除兵部侍郎疏言貴戚用事未有不害家凶國漢唐以來歷歷可鑒陛下臨御肺腑之戚未嘗假以事權臣願推廣之俾各保其爵祿無高危滿溢之虞廷瑞列侍從僅歲餘所上章奏皆見嘉納紹熙改元以疾謝事遂以朝請大夫守權兵部侍郎致仕卒贈太子少保子直清

諸葛直清字子嚴以父任歷海口鎮主管南外睦宗院知海陽縣通判廣州潮多水患諭眾修新堤

以捍田利周十保勸代義役人甚便之祠官凡十二任終奉直大夫晉其後也別見

黃偉字維之後即爲名更字叔張弱冠與兄弼之入太學屢試先多士鳴肆論抑祥策膾炙人口名震淮浙間與黃槐同時太學稱爲二黃第紹興二十七年進士除太學錄遷國子監簿轉對進所撰太祖政要論愛名器厲廉耻因及銓試冒名代筆其後任子覆試議自維之發時孝宗銳意恢復方講武事獻議者乞立武賢良下館學集議維之奮筆草疏謂賢良求文武全才不宜立武科事遂寢

或請經義專尚註疏賦論策宜更其體復下監學議維之獨立議狀大畧謂科舉之法不當變但時文之弊不可不救孝宗深然之除大理丞時少卿欲奏獄空維之以所隸有獄未竟不書名寺削維之名街以聞維之白執政有官守者不得其職則去力求外補差知邵武軍陞辭賜對論選用大臣當如王素對仁宗宦官宮妾不識名者可充其選又論乾道新書不當刪減內侍不得干預朝政等事孝宗面加褒諭翌日出劄子付勅局復舊法後歷官江西提學維之爲小官耻於求舉及更麾節

所薦引多寒士其挾貴而來者未嘗舉一人駁歷中外直道而行畧無阿曲居閑十年手不釋卷嘗與朱子論學人以鄉先生事之喜接引後進名士多出其門自號竹坡居士卒子以寧以簡以大猶子以翼皆能世其家

黃以寧字宗一維之長子也弱冠入太學文聲藉甚慶元中上舍釋褐分教惠陽擢太學錄差淮西漕司幹官會淮甸大歉人相食部使者檄以寧循行賑貸措處有方民賴全活甚眾幕畫明辨漕使嚴憚之通判建寧守喜事尚威關決有不可引誼

力爭守憤不能平嗾臺臣劾罷之父老遮留數千歸家杜門食祠延接後進講論經義亶亶忘倦郡守樂咨以政一毫不及私端平親政忤權臣者皆召以寧已卒弟以簡以大皆知州縣

黃以翼字宗台維之從子也嘗受業陳北溪蔡白白莊毅有立析理精詣晚年學益富所著有周易禮說

蘇總龜字待問德化人居太學紹興三十二年試中上舍優等第一孝宗登極恩賜釋褐登第授衡州教授累遷參淮東議幕奉祠有文學所著有論

語解大學儒行篇詩文雜著

李績字伯玉先濟州鉅野人父邴寓泉州因家晉江績年十二三時賦盆池詩故相何臬一見嗟賞績仕爲福建漕幕不忍去父母左右兩易主管睦宗院以便養親丁內外艱服除連丐宗院及奉祠館不復有仕進意買園結廬自號萬如居士常誦其先訓曰與其有求於世曷若無欲於已與其爲人所賤不若以賤自安以是居官及家居未嘗求人知通判福州事力請奉祠歸二年卒有文集十卷梅花百詠一篇

李綸字世美邴第四子以父任仕官所至有清操提舉廣東常平日適伯氏出守恩平酌于江濱弟兄相勵以清白傳家之語綸慷慨言曰倘負吾民有如此水遂投杯於江時江流洶洶杯停不沒者久之觀者無不驚嘆民歌之曰石門之水清且清晉吏一飲千古榮爭如李公投杯盟江流洶湧杯停停至今刻石與吳隱之酌貪泉詩對焉

李訖字誠之邴之孫也家學有聲歷官知黃州歲饑以緡錢庸饑民開河漕賈行賴之改知袁州蓄米二萬石以備凶儉累遷大理卿修斷獄例以麗

死而獲生者示好生之仁以生比而論死者存止
殺之義遂著為令權戶部侍郎乞正鄧友龍蘇師
旦罪以示天下除集英殿修撰知靖江府廣右多
官歿家流落者積錢置局周其歸改知建寧釐官
道百二十里以避灘梗奉祠久之卒號懼庵有文
稿談叢朱文公與相友善為銘其墓子洪宗脩謹
有家法

十七卷終

泉州府志卷十八

人物志中之中

列傳

梁克家字叔子晉江人幼聰敏書過目成誦紹興
末進士第一授平江簽判召為秘書省正字遷著
作佐郎時災異數見奏宜下詔求言既得旨遂條
六事曰正心術立紀綱救風俗謹威柄定廟算結
人心累遷中書舍人乾道三年郊祀雷震復條六
事遷給事中事多執奏無隱每勸上開言路上欣
納因命條具風俗之弊乃列四條曰欺罔苟且循

默奔競上嘉獎五年拜端明殿學士簽書樞密院
事遂叅知政事又兼知院事在政府與虞允文可
否相濟允文主恢復克家密諫數不合力丐去上
曰兵終不可用乎克家曰財用不足何以集事上
改容曰朕將思之詰朝上面諭曰朕終夜思卿言
至當毋庸去八年拜右丞相兼樞密使允文既罷
相克家獨秉政近戚權倖不少假借而外濟以和
張說入樞府謀中傷士夫不附已者克家悉力調
護善類賴之議金使朝見授書儀說欲移文對境
東以正其禮克家議不合遂求去以觀文殿大學士

知建康府陞辭上以治效爲問克家勸上無求竒
功既而三省密院卒移牒泗洲敵不從遣泛使來
舉朝震駭後二年湯邦彥坐使事貶天下益服克
家謀國之忠淳熙八年起知福州召除醴泉觀使
九年拜右丞相封儀國公十三年以內祠兼侍讀
明年卒年六十贈少師謚文靖克家風度峻整爲
文渾厚明白自成一家辭命尤溫雅多行于世
梁億字伯安克家子也襟度夷粹母秦國夫人剛
嚴奉事無違博親師友講學不倦以父任補官累
遷主管西外睦宗院通判福州卒嘗著論語集解

上之秘府進官一秩孫均通判信州

傳自得字安道其先濟源人父察第進士官吏部
員外郎宣和七年遣接伴金使時金將入寇察抵
韓城遇金酋幹離不脇使拜不屈而死事聞贈徽
猷閣待制賜謚忠肅自得隨母趙氏避地居泉為
晉江人以父死國補官幼時賦玉界尺詩李邴異
之因歸以女三應博學宏詞科不與遂不復應舉
杜門讀書不輟乾道間曾覲總管福建聞其名遣
使招之辭不應所著有至樂齋文集三十卷後官
至漕使弟自脩子伯壽伯成同登進士

二傳舊志
俱有傳今

存其

傳自脩字勤道紹興中監泉市舶務秩滿務之宿
弊十去八九後番商為貪吏所困號泣岸下或詰
之對曰昔官有鬚而白者主我故多載今不見此
官人衆奪殆盡聞于朝由福建機幕除提舉福建
市舶推髻之民舉手相賀知潮州海寇猖獗自脩
招降之請于朝籍為水軍賴以控扼海道累官直
寶文閣將漕江西卒

傳伯成字景初少從朱熹學隆興元年與兄伯壽
同登第歷官知連江縣力為民疏築水利民蒙其

惠慶元初爲大府寺丞進言呂祖儉不當以上書
貶朱熹不當目以僞學又言朋黨之弊起於人主
好惡之偏坐是不合出知漳州以律已愛民爲本
推熹遺意而遵行之累遷工部侍郎時韓侂胄方
議開邊語尚秘伯成言天下之勢譬如乘舟歲月
既久罅漏寢多苟安且夕猶懼覆敗乃欲徼倖圖
古人之所難臣則未之知也相府災同列相率徃
唁或以爲偶然者伯成正色曰天意如此官師相
規時也以爲偶然可乎宰相色動遂陳三事一曰
失人心二曰隳軍政三曰啟邊釁言甚痛切進右

司郎官權幸有私謁者皆峻拒之出爲湖廣總領
朝議欲納金人之叛降者伯成言不宜輕棄信誓
乞戒將帥毋使生事御史中丞鄧友龍劾罷之嘉
定更化召對面論前日失於戰今日失於和今之
策雖主於和尤宜惜日爲戰守之備除戶部侍郎
左諫議大夫在職餘五十日而抗疏十三皆軍國
大議或致史彌遠意欲使有所彈劾將引以共政
伯成謝之曰吾豈傾人以爲利者疏乞詔大臣以
公減私左遷寶謨閣待制知鎮江府以老請祠嘉
定八年召赴闕以病辭理宗即位升直學士落致

仕予祠伯成辭免爲太子竑廢進昭明天常扶持
人極之說史彌遠甚惡之寶慶初以先朝元老召
尋加寶文閣學士提舉佑神觀奉朝請雖引疾告
老而猶以國事爲念適大理評事胡夢昱坐論諫
貶遂抗疏言陛下以共工驩兜之罪加之言事之
臣今廷臣無一人論救萬一貶者死於瘴癘陛下
有殺諫臣之謗史冊書之有累聖治不報明年加
龍圖閣學士提舉鴻慶宮復辭伯成性資純實表
裏洞達每稱人善不啻已出語及奸人誤國邪類
害正則詞色俱厲疾革猶手草遺奏卒年八十四

贈開府儀同三司謚忠簡所著有竹隱居士集三十卷奏議十卷老志六卷子壅康

傅壅字仲珍慶元二年進士知崇安縣以鹽息錢
糴粟爲均惠倉買田以增學廩立義塚以塋露骨
邑人爲立祠以課最召累遷大理丞歷陽倅葉禾
爲豪商註繫大理獄具稱寃壅審覈得實卿以下
患之臺劾俱罷旋以獄真知南劍州改漳州與父
簡相繼爲守政如其父邦人安之徙撫州丐祠端
平初以都官召未造朝卒

傅康字仲孚以父任知古田縣猾胥匿簿書賦入

日少康籍其家出所匿按覈得實邑計以饒召爲
司農丞知汀州時兄壅守漳忠簡往來就養鄉人
榮羨徙南劔發奸摘伏吏不敢欺端平中累遷司
農少卿兼右司諫諳熟典章上甚材之督府挾重
權多難從之請引誼拒却朝倚爲重晚知袁州直
徽猷閣致仕少受詞學於伯父伯壽以文名

莊方字邦直晉江人隆興元年進士歷富沙鎮官
莆守擅放民租詔漕司覈實判官王佐以委方且
數其虛誕沽名之過方援汲黯矯制事以對且謂
減放皆實惠守得釋爲福建機幕或請鹽鈔事下

帥司方歷陳不可遂寢知昭州改瓊筦政尚廉靖
萬安黎爭田守擅興師致敗坐累罷歸後起叅議
京西卒子柟

莊柟字子修以父任補官荆湖制帥趙方器之辟
信陽州判官攝守事虜圍城與戰破之改羅山建
言遷治霸山之便朝議是之仍依萬弩關築山砦
虜至扼關擊之擒其木牌郎君通判江陵海櫃久
廢帥令修復之築櫃八隘口十三又增三海益兵
守隘以時停泄知峽州終江東叅議官

趙悰字彥忠待制思誠之子與朱文公善爲福建

運管以鹽法病民請恤竈戶均敷額歲衍鹽二百萬斤犯法者息知惠州覈積年吏弊得米七千斛錢五萬緡入于公斥其餘以惠民歷提舉常平卒于官

翁點字沂伯先莆田人登進士徙家于泉歷官湖南運判奏除本路酒榷行部潭衡間官道濘淖甃爲坦途爲江東提刑常平使者行役法民多不便點貽書諭意亟更之郡人德焉

王保隆泉州人以大理評事知莆田縣於鳳凰山下開永豐塘民獲其利

石起宗字似之先同安人徙晉江乾道五年進士第二人由勅局刪定官召試館職條對時務辭義卓然上覽奏稱善除秘書省正字再遷權倉部郎官會當輪對上言君子小人之情狀與天下治亂安危之機又言妄啟虜釁以開兵端不可不戒通判漳州知徽州除提舉浙西常平入爲尚書吏部員外郎引對奏言德雖聖人所能躬脩治非聖人所能獨致願詔大臣盡公任責破徇私媮惰之習又奏乞取仁宗洪範政鑒與敬天圖列置座右上嘉嘆久之命秘書省繕錄以進後以考較類試卒

于院

鍾元鼎字和卿晉江人乾道五年進士知鄞縣政尚愷悌耻以操切為能賦輸不時臺府諒之通判福州卒

黃宙字由仲晉江人乾道五年進士居鄉講授學者從之游多名士石起宗其一也有論孟解詩文雜著藏于家

曾秘字泰之同安人與朱文公友善乾道五年進士薦為國子監丞知惠州繕亭驛增冷泉叱馭等庵以便行者民多稱之後知漳州卒

曾植字子直晉江人太學上舍生用孝宗登極恩釋褐累遷勅令所刪定官司農寺丞輪對言用人之道不當以南北文武二其心又不當以腐儒之故廢棄真儒會大理丞闕上命補之尋出知南劍州陞辭奏言三事一曰監司當擇其才二曰關節請託都下尤甚三曰謀國勿用小人以漢恭顯唐訓注為戒上大悅出奏劄付執政知湖州未_赴卒

盧應時惠安人少好學祖瞻博學砥德以八行應詔有詩集行世應時乾道八年特恩授寧德簿裁決疑獄民服其神時有爭牛者令疑莫決以屬應

時姦者知不能欺即歸其牛

陳世德字景申惠安人刻苦爲學文辭典實以辭賦占鄉貢第二乾道八年特奏主莆田簿老成練達郡守林黃中深知之兩檄攝縣莆人號爲佛子再調惠州錄事有詩號殖軒集

林宗臣字景何晉江人乾道八年武舉第一歷襄陽機宜擢閣門舍人輪對言泉漳汀三州經界不行之弊憤激深切意有所指朱文公亟稱之出知欽州條奏邊備甚悉卒于官

黃子中晉江人南唐前鋒將軍福嗣之裔少遊場

屋不遂歸休林泉自號南陂處士工詩有南陂集鄉先生劉天麟題其詩曰自嘆苦明詩不老羨君詞氣凜橫秋爭知兀坐茅簷下得見凌雲五鳳樓

曾賀孫通志賀作荷字景卿晉江人淳熙中由懷安簿

薦知崇安縣下車首蠲合戶錢歲二百萬募舟以濟溺歲饑煮粥拯救發義倉出貸自輟餐錢償之朝廷遣使巡行民遮道言狀使者爲上其勞竟以勤民得疾卒

黃甫晉江人弟且並居右庠甫有疾且刺股以療之疾愈終不自言及旦疾甫燃臂叩天且疾亦愈

甫旦俱淳熙八年武舉甫知吉陽軍且官至武經
郎知欽州子夔

黃夔字一之以蔭補官歷知七州所至以廉惠稱
宜溪蠻偕卒爲暴部刺史辟爲守至郡殲其首諸
峒爭納款事聞遷三秩五嶺瘴惡仕者計日待遷
夔往來三十年家人皆無恙郡守黃朴表其里曰
慶遠

趙庚字叔初晉江人淳熙八年進士歷廣西常平
幹官久不調嘉泰初相臣有斫席之舊移書諸司
津遣入都將以學官處之時韓侂胄用事庚引疾

力辭親舊交勸不答後客五羊廖槎溪爲帥尤加
敬焉及卒貧甚門人黃以寧哀金塋之

高禾字穎叔晉江人世居安海伯父倬紹興八年
登第終知南恩州丁丑父伉與叔似復聯第伉終
通判漳州禾淳熙八年進士知僊遊縣恤僧寺省
泛科築下頓橋人免病涉知惠州創楊梅大奚二
寨且命鄉總聯比保伍以禦鹽客之暴仍奏乞下
諸郡爲法陞提舶改提舉常平召除將作丞積遷
兵部郎官卒子漑通判汀州

蔡霆發字子飛南安人居白石村學行純篤淳熙

十一年進士以邑最登朝主管官告院卒所著有
家訓集鑒

儲用字行之晉江人淳熙十一年進士知建陽縣
有惠政朱文公亟稱之會黨禁起罷去後擢守光
化移襄陽鄧民樊快明率衆來附制司約回時勦
之用宣言謂勦不勝則吾代虜受禍勝則吾代虜
受怨他日豪傑謂吾戮已降更以仇我則吾代虜
受仇貽書制閫制臣大恚竟用是罷後直文華閣
知廣州未上卒

陳震字省仲晉江人淳熙十四年進士知歐寧縣

歲旱勸分指俸爲倡再令新建適更新楮以帑積
舊券代下戶輪租通判饒州知紹州攝憲節卻臺
府例券數千緡召除軍器監丞過大府丞奏乞減
二廣丁錢奉祠歸里卒有春秋解史編雜著數十
卷

黃克恭字彥禮南安人淳熙十四年進士教授循
州講授不倦知寧德縣以最聞通判廣州海寇掠
境盛夏力疾督師擒其酋以徇辟知新州奏減丁
米民德之累遷度支駕部郎官奉祠歸起興化郡
在郡六月卒

林谷字聲之先福州閩縣人家于泉淳熙十四年進士知上虞縣通判嚴州以倪思薦召審察時權臣柄國有欲媚之者挽谷輸金為壽谷嘆曰書生攻苦焉有以奉權貴若然審察但餌我爾徑註潮州通判歸居官善審讞或疑其以數鉤笮谷笑曰吾何術臨事心無私繫而已人以為名言

林洽字濟叔事親盡孝人士稱之淳熙十四年第進士有文名嘗知福州閩縣初政廉勤通判鎮江府朱上卒

林瀛字廣叔洽之弟也慶元二年以明經第進士

嘗知廣州東莞縣以政績最諸邑使者薦召除監左藏庫遷國子監簿知汀州卒

莊夏字子禮永春人家貧少孤從兄晦學登淳熙八年進士慶元六年大旱詔求言夏時知興國縣上封事極言威福下移乃陰盛陽衰之象宜體陽剛之德使後宮戚里內省黃門思不出位此抑陰助陽之術也疏入召為太常博士開禧二年遷國子博士陳邊釁不可妄開議者難之累遷宗正少卿兼國史編修官直學士院訓詞華潤論奏明切封還尤多又言今日之患莫大於兵冗乞下將帥

令老弱自陳得以子若弟姪強壯及等者收刺之
代其名糧上曰兵卒子弟與召募百姓不同卿言
是也除兵部侍郎時宰相諱言邊事廟謨密秘人
莫得聞夏言西蜀潰卒宜討宜招江淮制閩宜分
宜合山東忠義宜刺宜汰乞詔侍從兩省臺諫與
二三大臣爲議狀以聞忤柄國者意遂累疏乞閑
以寶謨閣待制奉祠進煥章閣待制自號藻齋老
人嘉定十二年誥封永春縣開國男食邑三百戶
賜紫金魚袋卒贈少師所居在蓬萊山寧宗賜第
府城始自永春徙居之父裳贈中憲大夫葬鬼岫

山光宗爲之改曰錦繡山既卒寧宗贊其像有堅
冰志操忠言逆耳之語其被寵遇如此所著有禮
記解行于世子三人夢閣終新城宰夢序庚辰進
士歷太常簿朝請大夫

莊彌邵夏孫也以蔭補承務郎監福州水口鎮累
擢軍器監丞輪對以進德脩業爲言曰廣殿之對
禮貌親而情意疏廣廈細旃之講誦說多而推行
少上嘉納之立朝多所論諫與弟刑部郎中彌大
咸有聲宋亡棄官不仕時蒲壽庚附元爲中書左
丞辟宋故臣之在泉者復其官彌邵改肇慶路治

中彌大改廣州路治中並不赴

顏孝初永春人力學起家嘉祐四年進士初廷對有陞黜孝初兩中南宮以文名世又長於詩官至秘書郎

顏褒孝初孫家永春安仁里妙齡游江浙邃於經學詞藻豐贍書法尤精講席一開從者雲集片言隻字人爭寶之內典亦悟解暮年講佛書或講杜詩聞者解頤

顏擁字子養孝初族人由永春徙晉江開禧乙丑進士教授滕州歷會昌南海南康令並有政聲通

判循州知梅州顛寇陳三率眾萬餘人逼梅城擁激厲將士分隅拒之賊遁去甫上其功會病卒

有二顏兄弟傳今存其一

薛舜俞字欽父同安人紹熙元年進士教授南劍州差江東常平幹官賑荒多所全活改知金華縣守督宿逋峻舜俞引誼力爭請寬其期民始樂輸舜俞問學淹貫議論磊落仕數齟齬里居教授門人多通顯者有文集及易抄詩書指行于世

薛舜庸字惠父繼舜俞登第調龍溪尉改分寧丞知古田縣民間牛死例輸錢于官舜庸嘆曰民不

幸喪牛又責八錢是重困也立命除之增廩餼建閣藏書以惠生徒通判興化軍未上卒

楊士豁字伯達晉江人紹熙四年進士知長溪縣以清簡稱嘗爲寧德丞令不之驩令被劾去民詈之遮留其裝士豁衛之出境及爲長溪尉少年盛氣有不慊輒捶縣吏既而謝過士豁曰長溪尉治長溪吏何謝爲其寬而不校如此晚知連州未赴卒

陳洽字澤南同安入大學慶元二年進士歷僉判昭州知懷安漳浦溧水縣通判廣州在昭時攝郡

逾歲卻例券金不取崔與之服其公廉洽爲文根極理致長於表啟偶儷精切人以典制期之未六十卒有遺稿數十卷

連三益字叔友安溪人登慶元二年進士知沙縣庭無留訟及去民遮留千數倅廣州盡却餽例人服其清再倅紹興未上卒

尤台字公輔安溪人八歲能屬文慶元二年應童子科舉中書試以公則悅賦數刻而成詞藻絕出擬奏賜官格于吏議僅免三舉不第而終

陳權字巽行晉江人號朝陽居士註老子道德經

編類漢唐君臣圖有朝陽詩集

傅烈字承仲晉江人以易學授徒戶屨常滿慶元五年第進士試中教官科歷南劍惠州教授講經課文矩矱整飭改知保昌縣通判循州憫鹽鈔抑配屬邑之擾招誘商筏平直售之不取贏自潤民懷其惠知梅州未上卒

傅天驥字君遇烈之子家南安嘉定四年進士儀狀秀整博涉書傳教授建寧朱文公未有祠白于郡守立之俾諸生習伊洛諸書不專課以藝文理學由是益盛改知龍溪縣通判福州著有桮齋集

林萬字仲至永春人慶元五年省試第二連登進士調惠州教授歷三省掌故恬於榮進以謁光範為耻未幾劾罷復為沿海制司幹官改知宣縣城王曹字希武嘉定十六年省試第一教授惠州秩滿入為太學正遷博士較藝禮闈典舉欲私所厚以險怪之題冠多士曹識其文曰必其人也典舉色阻易名次而銜之揭曉以劾罷通判

余克濟字叔濟安溪人登慶元五年第尉侯官有貴官治第求尉廨地及教場益其居帥諾之克濟袖啟力爭不可世多傳誦為浙西常平幹官幕書

明辨諸使交薦之知梅州將上有傳其境盜發或
勸之徐行克濟曰不若乘其未集亟圖之單車就
道克濟肫肫儒者而勇於義如此治寬平可紀卒
年八十其學邃於春秋著通解十五卷

吳子斌字伯全同安人少遊上庠有文名登嘉泰
二年第知南豐縣有惠政秩滿民詣臺借留者千
計通判肇慶府卒于官

鄭輪字景行德化人嘉泰二年進士尉保昌獲強
盜不肯論賞曰人命可易官乎為龍南令邑上鄉
隣山峒民舊不輸租一日數十輩以長鎗挈錢而

至吏驚怪詰之曰聞有好長官願為王民秩終民
愛之遮送不得去知南城縣會盜發江閩盱江諸
邑擾動輪悉意摩拊無一人附賊者甫代去而邑
被兵人謂行善之報歷廣東運司主管文字辟知
循州卒輪篤固自律以廉終身

陳宗衢字伯可晉江人嘉泰二年進士博學能詩
而踈吏道閩帥胡榘嘗以職事督過因覽和詩擊
節嘆賞遂加敬焉

梁克俊字叔明晉江人嘉泰初知循州積帑數千
修城葺學循人多其功祠之縣治

羅知古字子隆晉江人開禧元年進士蚤游鄉校有文名居官以廉平稱仕終通判興化軍

徐浩字東之晉江人開禧元年特奏名第進士爲汀州推官事繼母孝母寢疾累年扶掖不離側中裙廁牖皆自浣滌母子皆以壽終

楊景隆字伯淳晉江人開禧元年進士博學強識講授經史鈎玄提要生徒常數百人所著有春秋漢唐通鑑史志解學者傳之官終建寧司法

參軍

莊壬字子中惠安人登第尉永嘉鹽寇掠境憲司符夜至壬不待白郡亟發卒偕寨兵俘盜數輩上

謁守楊簡怒其擅命欲行軍法建壽會僚屬立壬與巡檢壽下巡檢懼拜祈免壬屹立不動通守以下爲叩頭諸曰尉權以濟事可旌也何誅爲簡意解乃釋衆強壬拜謝竟不拜謝拂衣去諸臺壯其節交章薦之終海豐令於詩甚工

黃學行字上甫惠安人登第教授全州嘗集歷代褒崇先聖故實冠服奠饗儀註爲尊師始末上之詔頒太學通判建寧府知循州顛寇據松梓山作亂招捕使合兵破之奔逸嶺外學行激厲吏卒追擒其酋以獻遷秩因乞增州兵從州節制年六十

一卒有史說坦齋類稿

張巽字子文五代漳州刺史清溪之裔父寓奉議
郎知臨江軍嘗與張南軒共學淳熙中南軒講學
長沙城南書院寓遣子巽從之遊及歸贈以二詩
指示爲學根本且致屬望之意是時晦菴之學盛
行於泉謂之清源別派惠安有劉鏡叔光者稱爲
高弟巽間從之遊因得所聞於晦菴者未能釋然
曰恐晦庵之教不止是也乃走武夷謁晦菴以所
嘗與南軒講論中和之旨告之曰此某與南軒晚
年畫一功夫也臨別又請教晦菴曰南軒記嶽麓

某記石鼓合而觀之知所用力矣巽退而喜曰吾
固謂其不止是也既歸日從事於涵養體察又益
明淨人或勸其著述對曰尊其所聞則高明矣行
其所知則光大矣吾於所聞所知尚未能加意安
敢妄作有草堂在錦溪之上學者稱爲錦溪先生

方烜字成章惠安人烜幼聰慧治周易兼長辭賦
兩薦鄉書登第分教臨賀撤學舍而新之立規約
月書季考一如閩中隣寇發將及境守倅以下無
策亟召烜烜至部健卒出城南登高望寇所在以
示武旌旗蔽天賊果宵遁秩滿歸視邑庠隘陋率

士子請蔡令易遷於登科之陽赴調再分教建寧
未上卒

鄭思忱字景千安溪人授尚書于西溪李季辨解
折精詣生徒常百數嘉定三年詞賦首鄉薦中第
爲新興令除遺利錢三百萬知崇安縣復均惠倉
以私羅面錢市糴實之知南恩州浙東叅議官雷
變上封事言士溺苞苴習久難化民坐困且盜宜
去貪恤民節用蓄力除監登聞儉院卒年七十二
少豪爽晚而和粹凝然有守君子也著詩書釋
陳洪字禹範南安人由太學登嘉定七年第教授

新州轉致中州書數千卷以誨學者知莆田縣有
惠政通判建寧攝府事兵燹之後痛加撙節郡計
以裕後守深德之真德秀薦其謹厚可用晚開居
號淡軒弟浩庚辰進士見選舉志有文行

王沂之字春伯晉江人以門蔭歷官知新州有惠
政將去民遮留累日帥瓊筦却例冊錢貸民租卒
于官以曾祖秉嘗立義齋延師儒誨學者厥後寢
廢遺命子起震成之齋闢于家之南捐田三百畝
爲師東脩且餽親而貧踈而賢者真德秀守泉善
之爲定規條表其閭曰王氏義塾云

許巨川字揚甫同安人嘉定七年進士歷廣州教授篤意訓誨成就甚眾改秩知東莞縣拊摩愷悌催科數負殿中書劉克宗時為計使閱其斷訟以為仁至義盡主管治司辟守象州卒

莊夢說泉州人嘉定七年以迪功郎知僊遊尉下車究心職業年餘吏民畏服田里帖然

董洪字穎實晉江人嘉定十三年進士第二人為太學錄遷博士丐外通判南劍就知郡事蠲役錢苗米以萬計創陝陽濟糴二倉以待歉歲更築延平書院士民德之

陳霖字傳叟晉江人嘉定十三年進士為瑞金尉紹定中盜發江閩延及東廣至境霖出迎敵力屈被執不屈遇害

鄭至果字子剛晉江人嘉定十六年進士授福清尉丁內艱有芝產于墳調永福永連帥聞能治劇檄攝閩與永福令二邑皆治改建昌令既視事曰官民不相信何以為治盡刷前令預借之數給鈔還民民始信服修學宮造輿梁時有蛉患至果至官遂息且產瑞麥民生祠之改知梅州州屢易官百凡廢墜至果閱實修舉百廢俱興齟冠出沒郡

境戒嚴擒其亮渠梟之境賴以安

魏必昌字世復晉江人初尉懷安年尚少有豪家
訟田久不決必昌折以禮法兩豪皆服移興化錄
事廉直自守無敢干以私有新貴人挾中官勢羅
織仇吏獄囑必昌斃之且脅以危語竟不為動吏
得免劉克莊贈以詩曰守法仁人勇防身處女嚴
洪天錫字君疇晉江人寶慶二年進士歷官郡縣
執法不撓拜監察御史兼崇政殿說書首諫以正
心格君為說曰臣職在憲府非惟不能奉承大臣
風旨亦不敢奉承陛下風旨復疏言為天下患者

三曰宦官曰貴戚曰小人劾董宋臣謝堂厲文翁
章五上出關待罪理宗詔謝堂厲文翁已改命宋
臣俟續處天錫言義不與宋臣共留會天雨上天
錫以其異為蒙力言陰陽君子小人之所以辨蜀
中地震浙閩大水又極言貴戚宦官之害申劾宋
臣擅奪民田惡不容逭又言脩內司動稱御前良
民受害願毋使史臣書曰內司之橫自今日始疏
上至六七最後請還御史印謂明君當為後人除
害不可留害以貽後人今朝廷輕給舍臺諫百司
庶府而獨重北司倉卒之際臣實懼焉言雖不采

行然終宋世閹人爲之氣沮除大理太常少卿皆
不拜後起知潭州威教並行踰年遷廣東轉運判
官召爲秘書監侍講遷秘閣修撰福建轉運副使
皆辭度宗立召入臺復辭疏病民五事曰公田曰
關子曰銀綱曰鹽鈔曰賦役又言在廷無嚴憚之
士何以寢奸謀遇事無敢諍之臣何以臨大節累
召皆不至最後進華文閣直學士致仕加端明殿
學士疾革猶手草遺表以規君相卒謚文毅天錫
言動有準繩居官耿介臨事是非侃侃不可回折
所著有奏議經筵講義通禮輯畧味言發墨陽岩

文集

魏國梁字君用晉江人紹定二年進士爲番禺推
官賊寇河源國梁銳身諭降斃于道中事聞加贈
典官其後一人

吳燧字茂新同安人紹定二年進士累官監察御
史上疏以正紀綱開言路爲首務又論鄭清之爲
執政弗愜物望湏宦官宮妾知名者爲之除大
理寺卿不拜而去再歲召爲秘書監入對願絕內
降裁私恩聚忠賢抑嬖倖節不給之費去不良之
牧擢殿中侍御史兼侍講時洪天錫論董宋臣甚

力燧請行其言改禮部侍郎未幾奉祠度宗立召
為兵部侍郎

呂中字時可晉江人淳祐七年廷對第六人教授
肇慶府除國史實錄院檢閱上疏言當去小人之
根革賊吏之弊遷國子監丞兼崇政殿說書言人
能正心則事不足為人君能正心則事不足治理
宗嘉納之以予給歸召為秘書郎丁大全忌之出
知汀州尋復舊官主管成都玉局觀卒演易為十
圖又有皇朝大事記治迹要畧

王序字景禮晉江人淳祐七年進士授尤溪尉歷

知長泰縣時郡僉幕預徵大禮銀及打量田土文
移甚峻序白郡力爭之守文翁愈加敬任後攝守
惠州瀕江無城海寇騷繹序浚壕塹團保伍郡賴
以寧得代航海而歸宋亡徜徉丘壑以終身焉
陳龍復晉江人寶祐四年進士歷官大府少卿天
祥開督南劍遷復為督府叅議守湖州積糧治兵
天祥倚賴及移屯為元兵所襲死焉龍復沉厚樸
茂有前輩風歷官所至以清儉稱

周鐘字君與晉江人咸淳七年進士授南劍州判
官安靜為政志存愛民百姓賴之卒于官及歸葬

行道之人皆為流涕

劉志學字師孔晉江人咸淳七年進士教授台州以親老歸省元兵滅宋杜門不仕蒲壽庚欲羅致門下固避之從學如雲時或縱飲劇談以泄幽憤云

林介卿晉江人登咸淳十年進士尉漳浦遷羅源令有惠政民愛之如父母再調龍巖時巨寇出沒介卿修西寨募民儲穀時加訓練號令嚴明寇不敢犯鏤朱文公諭俗榜以教民旌孝門錄死事有故循吏風卒于官

劉叔智晉江人咸淳十年進士授金華尉府帥年壯氣盛僚吏莫敢可否叔智攄理正救甚多真德秀守泉叔智白建翼城江萬里力薦之以官告院召對論天下大勢與當時急務詞意梗切有勸使謁鄭清之者謝不往及清之拜相坐萬里黨劾罷遂杜門不出

呂肖翁字希聖晉江人有俊才方弱冠人爭售金幣購其文家居授徒自給自號所盤雖貧病羈窮不介意人莫能窺其際云

鄭曾子字子可晉江人咸淳十年遊太學景炎丙

子隨蹕三山以迪功郎爲潮州司法未行泉州降
元蒲壽庚薦授武畧將軍梅州路治中不受閑居
終身平生個儻急義樂道人之善是非曲直正言
無諱郡縣大夫士有疑難事必造廬咨焉號唯齋
陳與桂字彌芳晉江人年少博學咸淳中領鄉薦
入元不仕隱于安溪足跡不復及城府文行高古
後學衿式號水竹先生

元

盧琦字希韓惠安人至正二年進士稍遷知永春
縣語具官守志宦跡下琦在元末與陳旅林以順

林泉生皆以文學爲閩中名士少受學於余子賢
子賢每語其友人三山陳忠曰盧希韓經學諳實
爲人簡重在吾門十餘年不見其有惰容真畏友
也及從子賢試浙省子賢道病卒琦不顧試期與
其友陳彥博經營大事以歸迨得祿視子賢家如
師在時載其弟之官與分廩而食琦僅少忠一歲
每別去見必納拜曰是吾師行君子稱其厚誼嘗
以事赴京中道遽還人問其故琦歎曰中原版蕩
矣因太息不已晚以近臣薦除守平陽州命下未
至而歿琦沒六年而元運終子杲曷洪武中舉人

材得官

陳信惠字孚中晉江人初試有司不利因學古文後以材能應帥府辟從平漳寇有功授山魁彭湖盧溪三寨巡檢歷南豐州判官省檄攝同安令改惠安多惠政調順昌尋以老疾致仕號退翁有中齋等集

傅定保字季謨晉江人宋咸淳中禮部奏賦第四時相沮抑新進未令赴廷試定保歸益力學未幾杭都不守德祐景炎間屢有風以仕者皆辭大德初提學吳濤薦授漳州路學正首以太極圖西銘

合而講之聽者悅服改三山書院山長閱三月辭歸授徒養母至治中以平江路儒學教授致仕其講解能守先儒成說爲文溫潤典裁有四書講藁及詩文若干卷

諸葛泰字亨甫晉江人父元中以人才辟舉仕松江府同知泰少聰敏有學行以父蔭授汀州路明溪巡檢未幾告歸居家力學經傳奧義多所發明今四書大全諸儒姓氏列泰名弟晉

諸葛晉字仲昭以明經授福建行中書省檢校兵興省檄分治尤溪縣保障境內民賴以安尤溪乃

朱文公毓秀之地先是以所居爲書院後廢故址
悉爲豪家所有晉首訪復之書院池中產瑞蓮二
芝草五元亡不應徵辟徙居潁上以壽終

趙甫瑀字瑩卿宋宗室子也領鄉薦除知寧遠廉
介有守愛民禮士人稱政教父母任滿改新城以
母老表辭歸侍得旨改福州之閩清後母喪服闋
稱疾不仕

王翰字用文其先廬州人襲祖千戶爵有能聲以
省憲薦除廬州路治中政譽日隆平章燕只不花
鎮閩辟爲從事累遷潮州路總管兼督循梅惠諸

縣至州大布恩信已逋責緩徭役簡刑罰興學校
禮儒生事之害政者悉罷宿孽順服若良民既而
叅政陳復代領州事翰歸道經晉江寓居沙堤其
地有西山巖石刻海天一色翰書也後徙居永福
山中號友石山人居十歲卒有友石山人稿

錢褒晉江人熙之後也性純孝母喪負土成墓結
廬居山葷腥不入口形容毀瘠終制方還治平熙
寧中郡守徇州人之請聞于朝乞詔試擢用以勵
風俗嘗著有志孝六篇并進之

陳元吉惠安人年甫十二家失牛隨父求之過石

洞有虎躍出銜其父項賴所戴蓬笠障礙牙鋒纔及髻得不死元吉直前擊虎連十數杖不脫遂刺虎中目虎乃釋其父而走父子持杖以歸鄉人異之

吳德彰惠安人宋乾道間兵荒父母俱沒于外時德彰幼少欲求骸骨以葬既長訪不可得乃以檀木刻像葬于山谷自後山下有香氣襲人經久乃息里人號其山曰香山

陳成字公美晉江人敦行孝義不慕利祿號雲心處士家居課子孫讀書鄉閭有事多請質焉至正

間年九十餘監郡僕王立重其四世同居六葉相見因表其門曰高年耆德扁其居曰衍慶卒相華詩社諸名人各賦詩以記之河東張翥臨川危素爲之序記

顏應祐字孝先以兵難遷徙失母許氏所在訪求二十六年足跡幾徧海內不能得一日有告以母在雲南者即往求之行至蜻蛉嶺始得焉遂迎以歸士君子咸歌詩以嘉其孝

呂祐晉江人至正末郡城陷有卒拔刃脅其母索財祐奪其刃指盡裂因眩仆地良久而甦開目視

母曰母無恙我死無憾矣遂瞑目死

趙深道晉江人樂善好施至正甲午歲歉饑殍載路深道於中和堂設粥令饑者列坐供之所活甚衆既而大疫死者相枕藉深道造舟施輪其下會衆僧以長繩挽拽沿街搜索或遇門閉輒排以入舟挽各城門外埋瘞之日不下數次有司以聞于朝旌表其門曰義士

黃道賢晉江人有至性嫡母唐無子道賢襁褓時生母蘇以疾去道賢既長力請於父復之孝養二母父篤疾醫莫效道賢祝天願減己壽一紀以益

父父尋愈比卒果延一紀廬墓終制至元初旌其門

右人物傳始唐貞元終元季世皆沿舊志也先進諸君子德行節操事業文章卓然足垂不朽即才効一官善徵一節亦堪備揅掬之用生丘壑之光而考亭道脉傳入溫陵者所著錄二十餘人太史公所謂附驥尾而行益顯者也夫取法欲高論人宜恕惟大節名理所繫衡品不得不嚴間有致身崇臚政學可稱具在舊志而今僭削之惟互觀者自會焉乙酉志列林純子於名宦列顏伯錄於隱

逸而隆慶志置諸叛臣竊謂顏伯錄辭官高隱與鄭曾子同而或夷或跖判然為兩似未當也姑闕之以竢論定

十八卷終

泉州府志卷十九

人物志中之下

國朝

自胡元亂華賢人隱遁我不得乘風雲而依日月即沉淪草澤不卑小官而聲實蔚然未嘗以其故誣焉逮文治日盛應運登進者寔寔與上國爭衡今茲列傳在國初則首巖壑之幽人在累朝則多奮庸之雋彥非以隱見為軒輊蓋各關世運云

陳亦言字汝納晉江人元至正間侍父瓊來官泖州鹽場因家焉刻苦力學貫穿經傳子史於詩賦尤工洪武初世路清夷猶不樂仕進日惟與蕭子

王趙應嘉趙仕寬輩相往還講論吟詠所著有潛齋集

趙士亨字應嘉晉江人元季吏于縣未幾棄去杜門讀書以求聖賢之學後隱于九峰山父早喪明母復老病而奉養周至湯藥必親累歲不少懈父母相繼沒居喪盡禮廬于墓終喪乃歸教授于鄉時山寇呂光甫嘯聚剽掠所至焚燬獨戒勿犯趙先生問舍洪武初由人材薦授繁昌縣仲窪河泊官強赴焉尋引疾告歸

莊逢辰字士明晉江人元季躬勤種藝養母雖在亂離中手不釋卷母卒喪葬一據考亭家禮洪武初或勸其仕咲不答曰惟教子讀書後進多師事之後以子琛貴贈大理評事

劉嵩字子中晉江人博通經史所爲詩文清新竒古不俟思索人謂其有謫仙才值元季不仕磊落不羈以詩酒自娛家無宿儲而處之泰然有知其貧而餽之者輒正色以謝或受所可受即送酒家及賙親友之乏者洪武初以賢良方正薦授廣西賓州判官卒于官旅櫬不能歸州人葬于州之門外泉之名士多出其門所著有中齋集

陳童應字敏達晉江人洪武四年由進士授榆次縣丞改丞安丘蒞官勤敏廉慎常祿外不受一錢藩憲考其學優廉幹以狀聞特降旌榜嘉之陞禮部主事卒于官孫道曾

陳道曾字端誠性資朴茂邃於易旁及諸經子史有文名操行卓然不苟徇流俗登永樂戊戌進士改庶吉士自陳授吳縣教諭陞瑞州府教授遷無爲州學正所至以師道自重爲湖廣浙江山西考官俱以公明稱卒于官所著有吳下集筠陽濡湏等集

張昭晉江人洪武初以監生知遂溪縣庶務修舉民物阜安修學校築陂塘教養兼舉

張廷芳晉江人世居城南之方山以講明理學爲務冠婚喪祭一遵朱子家禮自號退密翁以見志所著有易經十翼章圖蘊義若干卷

莊濟翁晉江人洪武初知寧德縣勸學興農懲豪猾均賦役修陂堰造輿梁民感其惠

鄭懋中名諱以字行晉江人以太學生領洪武丙子應天鄉薦授知程鄉治先禮義不尚法律民謠頌之程鄉民鮮知學懋中至首作新學校親爲生

徒講解自是始有登第者一日感疾戒其子具湯沐正衣冠端坐而逝民哀慕之立像於漢令曾芳之祠合祀焉

黃維清字源潔晉江人洪武十八年進士歷職卽署以才諳聞陞九江知府特賜勅以往九江土瘠民漓號稱難治維清廉勤平恕漸著治績卒于官

張度字孟欽晉江人洪武中以秀才薦讀書國學授錦衣衛都事永樂初陞監察御史正色臺端巡歷江左交南肅察貞度人稱其得憲體度初名佛

保及自交南復命

文廟嘉獎爲改今名疏乞省侍旋歸朝超陞江西按察使

黃永永春人少充邑庠生洪武中以通學許奏教諭被逮至京悉革爲民永以髻年株累欽發戶部充吏因典簿書習法律尚書試而竒之以人材舉授戶部主事永益恪勤祇職六年陞本部員外又六年陞寧波知府節冗清獄鋤盜安民三年考最調守湖州湖財賦地也屬歲饑永設法賑貸以餘間修水利豐歲倍入三年調廣信其勤民猶昔

清操苦節九載不渝致仕歸遷居晉江董營一宅
孫晟曾孫綬玄孫光慶見歲貢志光昇及喬孫喬
植喬植子琰見科目志喬棟喬常見任子志

楊曜宗字世顯晉江人幼聰警經學純正洪武丁
卯以明經薦授晉江縣學訓導陞嘉魚教諭乞便
養改晉江尋擢韓府紀善遷長史兩輔藩王以禮
文廟登極韓王方幼冲召入試奏對有倫 上喜曰
王之進學長史得人也特加獎賚翊導匡沃踰三
十年以禮見重引年乞致仕王以詩送之累數十
章有幾回闕下承恩日都是邱中課業時之句家

居屢以忠君孝親爲鄉後輩言之爲文溫潤典則
所存有桐月山房稿子輿別有傳

夏秦字西仲晉江人少讀書經傳子史靡不該貫
教授鄉里郡守胡器與部使者多造其廬咨以政
治洪武十六年召至京師欲用之首陳年老乞骸
歸簞瓢屢空處之晏如也或云元季進士不知何
許人避亂來居青陽山

倪維哲晉江人永樂二年進士選入翰林院爲庶
吉士維哲有文學才猷敏練散館授刑部主事以
讞獄詳明稱 上意賜幣尋陞郎中卒遣錦衣衛

官校送其柩歸仍命諸司祭之

劉孔宗晉江人永樂二年進士官戶部主事奉職廉勤多所幹濟陞刑部郎中湖廣叅議宣德間山西有警尚書蹇義疏改孔宗山西轉輸調度軍興饒給群小憚其嚴明搆以贓山西巡撫于謙謂孔宗律已過嚴多與流俗迕疏其誣事得釋正統五年力乞致仕居鄉抱寂不出者二十餘年以壽終

朱鐸字允學晉江人十歲能詩語皆超絕弱冠第永樂四年進士授官戶部主事性簡亢寡合退而家居以經史自娛請文者戶踵常接郡中石刻多

出其年卒年九十有文集藏于家

余福字萬祥惠安人弱冠登永樂四年進士奉

詔還鄉讀書起為行人使交州慰撫降附土人喜其不擾餽以金銀鈿鐲各一盤牛米若干皆却不受使還具奏其狀

文廟深嘉之俄與鄰舍朱主事有微爭時車駕北

巡皇太子監國所司偏坐福罪福翔于行在

上憶之曰是使交行人邪朕方欲用之安得有是命逮至北京廷鞫得實乃釋福以福罪抵朱所司失入皆得罪擢知撫州府御史嚴肅案無寃滯丁外

艱歸服闋改知平陽九江二府初

文廟所譴失入福罪者皆部院大臣未幾復用而福
偃蹇外任久不遷竟坐疾惡太嚴降寧波府同知
丁內艱再起同知太平府遂致仕家居手不釋卷
非公事未嘗至郡邑未嘗干人以私卒年七十二
蔣疇字嗣昭南安人早喪父家貧力學授徒以自
給郡守胡器試其文大奇之俾入邑庠領永樂乙
酉鄉薦登壬辰進士任監察御史貞度肅僚凜有
風采所按部貪墨吏先拔家而去其審覆多所平
反丁母憂卒于家

陳安字克成晉江人永樂十四年進士授工部營
繕司主事以才行聞陞衡州知府爲政清簡屬歲
饑安不待報開倉賑恤尋丁內艱服闋改重慶後
患足疾民苦遮留之扶曳而治者幾二載竟以老
疾辭歸卒年八十

朱鑑字用明永樂十五年鄉薦授蒲城教諭以學
行擢監察御史按湖廣請藩臬分道巡歷遂為定
格梅花峒賊屢勦弗平鑑親詣賊營開諭解散再
按廣東禁奸戢暴所至肅然有出巡錄廣人至今
傳誦正統初興武學以文武全才應詔董其事議

制定員頒降印信皆從其請權璫王振擁

大駕北征鑑時陞山西左叅政上疏懇留極言虜勢猖獗夷情叵測

太皇太后讀其疏泣下時大駕已出不可復止土木之變鑑勅兵勤王以遏南侵令諭陞右副都御史巡撫山西保障鴈門要害鑑涕泣憤恨以君父之讐不共戴天上疏言天位不可以無主神器不可以久虛宜急立儲君選智勇之將托忠義之臣開直諫之路杜權倖之門早革內侍之政再造中興之業雪前耻以圖後功鑑在山西十餘年前

後奏疏十餘上皆邊防大計所賜璽書五十餘道石亨曾以失機為鑑所劾疏懇致仕家居二十餘年壽八十八卒有司以訃聞諭令祭葬孫轡見任子志曾孫澹梧裔孫國有昌竹安期孔昭天應于訓于讚仕佳見科目志

陳濬字潛哲惠安人永樂中領鄉薦以乙榜授教山陰丁外艱服除麗水用薦者擢山東道監察御史立朝糾劾無所避恒與權貴人為仇出按廣西去貪污釋冤獄風采凜然九載考滿廉聲大著故事御史滿三考例遷京秩濬以母老懇請病南歸

遂不復起濟器質宏偉威儀詳雅嫉惡好善出於天性性至孝母高年失明常在床褥躬自扶掖久而不怠居喪戚易兼至其以御史居家閉門養重不妄交接有司以下皆敬憚之

趙應字孟敷晉江人弱冠入邑庠以誥誤謫為吏宣德間授南安典史當道薦擢浮梁知縣拊教善良痛懲狡猾縣東南有青峰渡灘水悍急恒覆舟應具牲醴為文以祭水神其患遂息秩滿解去民狀乞留從之陞秩六品仍知縣事再滿秩丁內艱去服除致仕卒

陳瓛字微仲由福州來家晉江性孝友不求聞達工詩詞宣德間累召不起號為微君

趙復字無疾晉江人隱于邑之孤山博通經史不求仕進冠婚喪祭以古禮為泉俗倡人多化之號莊節先生

顏隆字文盛永春人應貢入太學正統元年授江西吉安府推官廉明有威少師楊士奇之子犯法即誘執議刑當道交薦于朝擢河南按察司僉事胡虜入寇統師禦之虜引去封圉宴然景泰初疏乞歸卒年八十有二

崔惠字迪吉晉江人宋崔珙之後素慷慨有大節
領宣德十五年鄉薦任江西石城縣學教諭正統
戊辰叛寇陳椿陷石城執惠逼令從已惠罵賊不
絕口驅行里許會賊燬草營遂投火自焚死

莊敏晉江人正統十年進士任吏科給事中骨鯁
立朝論諫務存大體景泰元年出守雷州威儀嚴
重喜怒不形人不見其有為而事無不治尤注意
於學校云

楊輿字時載長史曜宗子也正統初以明經薦授
惠安縣學訓導入為邨王府伴讀執經敷陳多所

裨益王入繼大統舊邸臣類顯擢輿並出為處州
知事值山寇起輿奉委簡精銳嚴賞罰佐諸將帥
破平之巡撫上其功召見文華殿賜酒飯陞戶部
郎中綜理司事勤敏精密滿六載陞南京戶部右
侍郎天順改元調永州知府時總兵李震統兵十
萬餘勦廣西叛苗駐永郡輿調度多方兵民倚賴
城中苦厲疫輿加意軫卹病者給醫藥沒者子喪
葬貲子女不能嫁娶者助之所司奉行惟謹民霑
實惠已乃飭周元公祠擇裔孫二人為邑庠弟子
獎民間孝義改淫祠為社學一時政教煒然改觀

會入覲引老乞歸燕賜甚腆自是家居十四年周濟族黨優游山水人皆以陸地仙目之一日疾作乃邀親朋對酒為別曰某今年七十有七矣人生豈有長富貴者今日相者莫辭酒明朝合眼事茫茫未幾果卒蓋深於漆園達生之意云

何祐字天錫晉江人正統間貢入太學官儋州同知祐治儋廉謹夷曠興教事除苛政有訟立決無繫者決之時先以教戒而後量懲之訟者不之州長而之儋上官每閱祐所理訟牘必稱善居久之自免歸與朱都憲鑑楊侍郎與朱主事鐸溫中書

良相過從以老

李珙字廷璧南安人正統初由監生知蕭山縣廉潔公勤興學校均賦役俗生女多不舉瑾重法禁之民莫敢犯者後生育漸蕃婚嫁以時民深德焉景泰元年奔父喪歸民泣送如去父母為立生祠服闋改廣西懷集惠政類蕭山以老乞致仕

張惠字克仁度之從子正統間為龍游令平易為政以興學育材為首務景泰初處州寇逼境甚急一時鎮守者度力不能支爭去以避之惠有必死之志曰寇至而去寇退何面目還乎既而寇竟往

他境去而還者皆慚

溫良字元善晉江人學問該洽亦工晉唐書法舉
正統丁卯鄉試屢上春官不第閣臣選文學士為
中書舍人良與焉已察其性行雅醇更器之良出
入殿閣進退確有常度且祕密慎重有不言溫室
樹之風所撰制詞典麗稱代言體得之者不待請
求事後亦不受謝以此尤為內閣所重奔父喪歸
卒玄孫顯萬曆八年進士仕戶曹卽有文行亦不
壽

何觀晉江人永樂癸卯薦于鄉銓授中書舍人辨

事文淵閣以慎密得久留景泰辛未冬

睿皇帝在南宮觀土疏極論大臣王直胡濙等皆阿
附權奸不宜在左右來朝北虜留京師者宜驅置
之南方毋使為虜人耳自忤 旨下科道官者議
給事中毛玉等欲當以誣陷大臣擅開邊釁之罪
林莊敏聰葉文莊盛力護之詔杖觀百調外任出
為象山知縣在縣三年清介勤慎滿考乞休邑人
奔走送至衢界上者數百人

睿皇帝復辟閱觀奏召復原職力辭不起隱于古玄
洞修道養壽年八十九卒

楊智字思明幼有大志既領鄉薦聞臨漳林蒙庵
有性理學往從之游三年歸登天順八年進士擢
南京監察御史成化四年客星變為慧星智上言
妖慧示變災異迭至自非君臣恐懼旁求直言改
革弊政進君子而退小人不足盡應天之實宮闈
之事臣不敢言望 陛下深自省察裁處而已其
在廷大臣南京守備成國公朱儀叅贊機務兵部
尚書李賓並猥瑣無當不足膺根本重地吏部尚
書章綸則遣子應玄冒貫京衛軍餘而欲覬京闈
之薦刑部侍郎王恕則娶指揮妻旻氏為繼而其

偶失節之婦工部侍郎范理外似樸而內甚貪大
理寺少卿金紳喜徇私而多賣法應天府尹畢亨
之黃緣擢用衍聖公孔弘緒之淫慾驕恣凡此妨
國病民皆足以召致天變疏入遂賈衆怨成國公
儀尤惡之會郊祀百官赴內府光祿寺點齋儀令
人早鑰禁門智不得出為內臣邀宿儀發其事以
奏有旨械京問擬 上以郊祀重事而智不謹有
玷風憲特降三級為廣西布政司照磨久之轉化
州知州卒于官智歷仕未久其志節已卓然可稱
一斥不復竟死炎荒識者悼之

李汝嘉字士美晉江人天順八年進士授戶部主事出納勤慎時有貴幸侵民田者上命覈之得實奪以歸民復摧湖湘商舟清兩廣財賦搜剔奸蠹無敢干以私陞員外郎尋陞金華知府道聞母喪歸服除衢州蒞政寬平修建郡邑學均徭後賑貧乏葺武備雪冤滯建橋梁衢人至今能言之事蹟俱載衢志後陞浙江叅政致仕

詹靖字邦寧女溪人縣令敦仁之後初任廣昌知縣縣人有捐姓者素豪黠前令不能制靖至實諾法縣境肅然廉慎之操六載益勵後陞開州同知

卒于官

林玉字廷珪惠安人少失怙事母至孝由庠生應正統十年貢入太學以母老乞歸侍養二十餘年母沒乃復監其操行已為人所稱成化三年授廣信推官小心敬慎折獄明允後致仕歸家貧教授生徒自給不肯毫髮于求於人邑令有知其貧欲周之玉謝絕不受其介如此

陳睿字邦獻惠安人成化乙未進士授揭陽知縣為人敦厚詳密持法堅定不可撓以私居六年徵入為戶部主事督糧太倉又監兌于兩浙鈎稽宿

樊軍民咸便轉員外郎歷郎中在部以老成練達
稱積資陞四川叅議丁內艱歸服除湖廣提督太
和宮兼分守下荆南道先是太和宮提督專於考
校道流及會計香錢之事其兼分守自睿始睿在
荆南最久以清白著聞有劇賊號剗平王者聚衆
刦掠調兵征剿睿督運糧餉措辦有方軍無乏食
事平以軍功陞俸轉貴州叅政貴州雜徭夷道路
險遠睿已有歸志會雲南大霧連旬廷遣侍郎樊
瑩考察雲貴二省官吏睿齎 聖節表之京道遇
樊不為之訖樊銜之以年老考睿時輿論謂睿素

有清操實未老睿安受之不色温居鄉恂恂如未
常有位者有司不恒見其面子廷孫煒煌見貢舉
志

趙珏字德用晉江人宋莊懿王德昭之後也成化
丙戌進士授官刑曹同考會試擢廣東提學僉事
卒于官珏幼孤銳學妙契疾書身體力行造詣淵
邃為人重名教尚氣節其擢廣東時便道過家羅
文毅倫謫官泉中造珏談學豆肉孟羨終日乃去
至廣東訪陳文恭獻章質以學問而往來詰難不
苟為同獻章論學謂禮文雖不可不講然非所急

瑤貽獻章書浙人正以胡餘于不教人習四禮為
疑何輒開斯路獻章更號海雲瑤輒止之謂其流
於禪號獻章曰羅一峯僕哭之慟以為自今而後
不復有如一峯者今乃有執事也名為知文其同
考會試得謝文正遷卷薦置選首以即署為翰林
諸公所壓而瑤批謝卷曰狀元拜相必此人也與
陳獻章登崖山見張弘範勒石詩題其後云忍奪
中華與外夷乾坤回首不勝悲鐫勒石張弘範
不是胡兒是漢兒

謝寧字安世惠安人成化丙戌進士授揭陽知縣

方廉明斷折獄如流雖豪宗不少假借丁外艱改
江陰邑素稱富饒財賦充羨寧廉潔愈厲不私毫
髮興建社學選老成莊雅之士為之師月試歲考
俱有成法歲苦旱寧齋沐素服徒步禱于山川雨
隨如注至秋水暴溢壞民廬舍民告飢又發粟賑
之寧為政大率主興利便民凡聽訟必盡兩造之
情不鈎距苛刻以立威取名至久人愈信愛居六
年陞刑部主事卒于官江陰人立廟祀之

周源字子濟同安人成化戊戌進士家貧有志節
初偕計北上鄰舟夜遇盜源因得其遺金百兩盡

歸之及知石埭縣入為兵部主事奉身清苦人所弗堪中官怙直怙寵用事嘗被內密旨襲檢朝紳家至源家篋無長物僅錢數十服其廉由是名震京師一月之內陞員外郎武選郎中卒櫬歸不能葬憲副邵莊行部至哭以詩云有身全白壁無地葬黃腸命有司葬之

洪璽字朝寶南安人性恬靜無疾言遠色輕財貴義在邑庠時家無餘積伯父昆貧甚分月廩資之即歲歉不輟餽賢士夫以為難為詩文侈其事及伯父沒璽哭盡哀喪葬皆力任焉後任江西建昌

訓導卒

蔡清字介夫成化丁酉舉福建解元清源山鳴如玉磬者三日甲辰舉進士清自幼好學切于求道略於仕進請告家居講學水陸寺江南士多從之游久之赴選得禮部主事是為弘治初元吏部尚書王恕稔知其學行奏改為吏部稽勲主事時與談論諮訪清因上管見二劄言今日朝廷之患在紀綱廢弛以至士風日弊而民力日誣當大有以振作之乃可銷境內之憂靜疆場之警又疏海內名流劉大夏等三十餘人恕皆納用庶吉士鄒智

論事下獄罪且不測時刑部尚書何喬新方在告
清詣喬新強之出喬新即疏林智得謫官嶺南丁
內艱服除吏部有不悅清者以補禮部祠祭司員
外郎乞便養陞南京吏部文選郎中一日心動乞
終養至家兩月而其父沒每遇忌辰痛哭流涕終
日不御酒肉宗族內外有貧乏者恒賙恤之死而
殯葬之撫其孤門人貧者亦常衣食之嘗曰天地
間物當與天地間人共一介不取士當然也既受
祿于朝安得以耕莘之夫籍口蓋仕宦之入屢空
而不暇自計正德初即家起江西提學副使時宸

濠以飾詐冒賢孝名清預知其有逆節矣濠生辰
藩臬官當具朝服賀清獨去蔽膝而入曰以別於
至尊也凡朔望諸司皆朝王次日謁文廟清力請
其僚同日行禮先謁廟次乃朝王濠積怒因待宴
朝清不能詩文清謂朝廷方面官豈容藩王輕易
挫折據理以對濠益銜之罷宴出遂閉門引疾乞
致仕歸逆瑾專權方拔時賢以厭衆望不數月起
清爲國子監祭酒命方下而清已卒知者謂清若
存必不出也清素羸弱而色清氣和外間內辨其
學初主於靜後主於虛謂天下之理以虛而入亦

以虛而應因以虛名齋為密箴不以示人積久至
五十條皆自砥自鍼之詞嘗曰學宜養正性持正
行虛心涵泳切已體察八字要訣也又曰宋儒之
道至朱子始集大成朱子之學不明則孔孟之道
不著所著四書蒙引易蒙引諸書皆推原朱子之
意常置燈卧榻傍或夜分與諸生講論寢後思惟
有得皆亟記疾書聞所妙悟至今天下言易者皆
推晉江成弘問士大夫談理學惟清尤為精詣云
隆慶三年議從祀孔子廟庭未果行萬曆中僉都
御之詹仰庇諸易名於朝賜謚文莊大學士李廷

機復為請贈禮部侍郎子存畏存遠曾孫如川
見科目志

趙瑞字惟德晉江人少通春秋不務俗學而能得
聖人之意成化丙午領鄉薦弘治庚戌進士授戶
部主事陞員外郎中監薊州太倉黃土諸倉壩上
御馬諸厰臨清鈔關皆秉正執法不納關節常祿
外錙銖不染自權關歸家時囊中僅二十餘金至
洛陽橋中命兒子納之鞞中曰儻有開篋者毋謂
吾賊物耶其廉潔謹畏如此在官手不釋卷事親
盡孝撫寡姊孤姪甚勤有恩環堵蕭然而獨以行

誼經術遺訓子孫所著有春秋管見若干卷孫恒
曾孫日新見科目志日榮見歲貢志日崇玄孫世
典世徵世放見科目志

王宣字子鍾晉江人生而廓落豪邁薄於勢利受
業蔡文莊之門持論正大確守師說而間有所發
明如謂論學者合朱陸為一便非真知蘇子瞻之
文精神氣骨剛而無餒其極詆新法為小人所忌
惡瀕九死不悔合於孟子養浩然之氣朱子以蘇
張詆之未為確論他所論著類是學者翕然信之
弘治中舉于鄉試南宮不第遂一意養親終其身

不復應舉郡守顧可久建一峯書院治齋居講堂
為屋數十間擇士有志者肄業其中延宣典教事
蓋重羅文毅而因以重宣者如此嘗題詩清源洞
云玉龍卧井無消息搔髮星星坐夕陽未幾卒人
以為詩識亦其素志所存云

李聰字敏德別號木齋晉江人弘治庚戌進士授
翰林檢討充雍王府長史後改吉府聰自為舉子
時經術行義已為同時所推陳先生琛嘗稟學焉
及輔藩王以剛正舉其職事多忤拂正德元年疏
乞歸養以違限落職尋有詔起用竟不起家居杜

門動遵矩度鄉人敬重之稱曰李古先生

田崑字景瞻晉江人弘治庚戌進士授南京戶部主事權杭州北關以廉謹著擢南京吏部驗封郎中尋陞湖廣寶慶知府岷藩校卒犷悍崑馭之以法戢戢斂畏歲大飢發廩施粥全活者衆楚地多間曠崑發金鄰郡糴麥種千斛教民樹藝麥秋至民相語曰生我者田父也以親老乞歸養事父母愉婉篤至旣執喪闋服則築室城北與歐陽室相望靜坐終日息機頽氣若禪定者外事屏不聞也臺察郡邑諸司重其行義爲善俗坊表之

田崑字景玉崑弟也領弘治乙卯鄉薦授湖廣均州知州值凶歲軍興多方招撫賑濟民賴以活而流移者復業武當山鎮守中貴貪虐民不堪命極力抗制中貴怒欲中傷之例州官朔望謁山道士當出迎中貴人令道士故不爲禮以激崑怒伺崑欲答道士遂毀醮壇萬歲牌誣奏崑悖逆逮繫至京逆瑾用事搆成重獄大理卿燕忠疏雪其誣乃得釋竟削籍歸均人謠之曰太守憂民苦奮身抗猛虎直道古難容名位棄如土祠之名宦
張元壘字國信晉江人父旺成化癸卯舉人未授

官卒元壘痛先志弗遂少卽知力學居蔡文莊
門下以妙悟見稱與陳紫峰琛李筠溪墀王一懼
宣號稱四傑弘治辛酉領鄉書除滄州學正端軌
興文士習顧化流賊陷滄州城閉齋自守賊相戒
勿犯居民傍學宮者籍以安堵遷國子監學正擢
建昌府同知未抵任卒元壘學有深造淡於世味
居官貧薄沒後僅負郭田數石士大夫以爲難
黃鏞字于宣晉江人弘治庚戌進士授南京戶部
主事轉禮部郎中擢守思恩軍民府思恩故土官
岑氏世襲民夷雜處及岑氏敗餘孽猶時跳梁鏞

至悉擒捕之梟其首仍團結保伍令民緩急相救
增設縣治定稅額均徭役建學校置驛道大小衙
門悉用流官如內郡之法由是夷氓始識有長官
不敢肆騖三年移守桂林考滿丁外艱卒于家
顧珀字載祥晉江人弘治己未進士除知虹縣丁
父憂服除旌德公平明斷尤勤積貯寧國一郡歲
飢獨旌不害擢守和州復罹大飢不俟申詳倒倉
庫賑卹時部檄督逋甚急民貧無措則召富商諭
以大義高輸所有貸官秋成還之高民兩無所累
以治行旌擢南吏部考功郎中丁母憂復除兵部

武庫司時當正德頽綱之日事多因循珀秉正執法凡薪隸出納京衛勾解極意振刷宿蠹一清陞湖廣布政叅議行部至蘄有妖僧詐稱奉勅往名山掛幡所在恣橫密發其奸置之法寧庶人反南昌珀扼險黃梅爲池皖援會

武廟親征民爭逃竄榜諭安輯事平乞休五上廼陞湖廣按察副使子致仕嘉靖五年以薦起四川按察副使整飭威茂兵備旣至修理城堡墩臺召募武勇彈壓羌夷歷年賞番多虛糜一一核實餘銀幾萬兩創會館郊外令貢夷至者釋刀易馬廼入

守為定規民無恇擾踰年陞河南右叅政乞致仕以屢薦陞江西左布政使尋擢南太僕寺卿南戶部右侍郎署篆疏上便宜十二事留心度支京廩充溢攝憲部攝都臺無督江防俱精嚴仁恕不動聲色而事治民安在部五年以清望為一時推重屢疏乞休廼許致仕年八十六卒撫按官請于朝賜祭塋贈都察院右都御史珀清夷簡諒恬澹寡慾歷官未嘗以家累自隨室中絕媵侍之奉聲樂之娛出入僮僕皆短衣芒鞋毋敢履鞮平居燕處如齋端坐如塑教子姪以守法循義居常絕意于

謁若一方利病則不憚賅切授計有司如築田捍
鹵倡義療飢停征息民募士捕賊弛私鹽之禁以
通民利不啻痼瘕在身者其息爭諭善常以懿言
代鈇鉞和色當醇醪不義者忌顧司徒之知而衣
冠後進望以為楷至今里中猶稱述之云

傅浚字汝源南安人凱之子性謹厚弘治己未進
士授戶部主事丁父憂為逆瑾矯旨削籍瑾敗起
工部虞衡負外郎進郎中理薊州鐵冶釐革宿弊
省鐵竈費三之一遂為定制改都水出納不徇私
請鄉長固位賂中官屢索羨餘浚不從為所排出

為山東轉運同知卒于官

黃瑗字純玉晉江人弘治乙丑進士知山東長山
縣時山東旱蝗瑗多方賑濟隣境飢民來就食者
萬計有老嫗子高販戕于盜瑗計獲真盜寘之法
人服其明青齊有疑獄藩臬多檄瑗鞫之無不得
其情陞戶部主事歷員外郎中擢守肇慶以平賊
功進三品秩既而廣西盜起瑗統肇慶之兵會捕
以疾卒

留志淑字克全晉江人留忠宣裔弘治乙丑進
士授温州推官樂清有生員趙寧為徐姓所殺寧

子誣訟其父友張某爭貢害之獄成十餘年志淑
廉得其情出張坐徐抵罪擢刑部主事遷員外郎
中出守杭州浙鎮守大監果真逆濠羽翼也志淑
悉其叵測狀白臺察監司陰制之真欲起變一夕
搆市人火其居逃去延燒千餘家志淑令地方熄
火傳各衙門堅閉毋動真不得逞數日濠反報至
真將發益急志淑提民兵伏門外謀監司以常禮
入真曰知府造我反乎志淑曰無是也第府中役
從太多公心迹難白諸監司競為言真倉卒不得
已呼其衆出民兵盡捕送獄真旋逮繫大誅

武廟統六師征濠憲臣以徽為襟喉地疏志淑知徽
州至則止候駕丁夫罷民間諸所措備惟令人携
直隨宜僱募供應公私晏然有持檄馳角而入稱
奉旨擒人民某志淑疑其詐使人即傳中醉之酒
潛發封無一字擒置諸法息囂訟均兵徭徽郡大
治杭人思其政復疏乞還杭遷湖廣按察副使尋
轉布政司叅政適銅盤嶺洞賊起志淑察奸民為
賊耳目者擒治之凡報賊者輒弗令還繇是信息
不通集兵直迫賊壘賊援絕窮困遣人諭而降之
歲大飢巡撫欲行部往賑志淑曰都府不出廼所

以賑也一郡省供億費何啻百餘金因自請出賑
所拯救甚衆屬邑有腴田數百頃洪水決爲陂塘
設法導水而復其故仍築堤植柳以牢之民呼曰
留公堤遷江西按察使逾月轉浙江左布政使未
任卒子舉人元復奔喪辭諸司賻奠不受蓋善繼
父志云孫震臣教臣並舉進士

詹源字士潔安溪人靖之孫也母林氏娠九月而
父歿林矢志育孤携居泉郡城使就外傳源聰穎
力學弘治辛酉舉于鄉乙丑成進士授戶部主事
權稅河西務廉正獨持朝議以其有風憲體改監

察御史方逆瑾用事凡拜宮者必私謁謝源堅不
往瑾誅源名益著顧以梗直爲柄臣所忌時母方
就養廼乞恩奉母還已而忌者卒擠之就家轉貴
州按察僉事貴州直指使者阿當權意遽劾源不
職朝議源任末年無不職狀竟不行遭 乾清宮
災貴陽川湖方有採木之役廼留源督木源終不
肯通權貴問候惟殫心木務亟濟大工會香爐山
苗叛源督將卒勦平之事聞論功擢雲南按察副
使復與御史爭事御史欲庇所私墨吏源執不可
竟坐忤免歸源歷官內外皆奉母以從泮瀆供養

外不私一錢分田產皆推其膏腴與兄捐金於安溪上流疏積水三十里溉田至今爲鄉民利郡故有廢寺田里中豪事占籍爲奇貨源獨無升合染足跡刺牘不交公門至地方有不平事如白葉坂山寇就捕貪功者濫及良民九十餘人源投袂起見直指使者白出之年七十一自預作墓誌銘謂生平勉企古人而卒以褊中負氣兀傲忤俗此雖不敢自譽然其意氣亦可想云子仰庇別有傳
葉寬字栗夫正德戊辰進士初授蒙城令遷工部主事監通州磚廠中貴人倚角爲奸利憚寬嚴正

賂以寶玩寬峻拒之中貴人不敢縱積資陞營繕司郎中嘉靖初外戍陳萬言新貴幸賜第於西安門外命寬董其畫萬言憑寵怙侈寬言地迫宸居高廣踰制宜半裁之萬言佯具疏辭以激

上怒果有旨逮寬杖之繫詔獄及得釋出爲浙江叅政竟以罪賊令事守法不見容尋被擠歸

林鉞字宏用晉江人正德戊辰進士初授江西崇仁知縣三年改增城遷至南京戶部郎中嘉靖初出守大平鉞令崇仁時請改折京兌二米有才能聲及爲守多建立築楊家壩裁采石諸驛供應夫

革馬政羣長召種荒田歲省浮費金數千增穀至
十餘萬石又奏免水旱災傷沒豪右匿田入于學
以贍士士民賴之未幾歿百姓人人流涕後二十
年紀于太平之名宦移檄入郡祀鄉賢

傅檄字廷濟南安人正德辛未進士祖凱父浚相
繼登第檄有文學登第年方二十授行人司行人
時浚為山東運司同知暴死郎中檄奔訃至詢知
其故痛繼母王不安於室致父非命不欲與母共
居晝夜憂憤一哭輒嘔血數升遂佯狂出居于外
朝風日中夜卧地上垢面污服遠妻屏子人以為

真狂也會有子壽之喪不哭或詰之檄曰吾不能
為子敢為父乎檄窮愁萬狀欲得罪人甘心之久
而不可得隱忍不言但以狂廢終其身然時時發
之聲歌若顛若醒陰自見志云既卒有司題之曰
苦節純存

郭楠字世重晉江人正德甲戌進士授浦江縣令
有廉幹聲徵入為監察御史嘉靖初應詔陳言一
曰納諫諍以開言路二曰仕老成以輔聖德三曰
卻貢獻以蘇民困四曰均戶口以服人心奉命稽
覈兩廣倉帑廉奸剔蠹叅劾藩司方面無所回撓

疏薦三河驛丞前翰林編修王思通衢驛丞前刑部主事李中烏石驛丞前戶部主事戴冠乞量移錄用按順天等四府徐國公光祚奏占軍田郡守郭九臯以實報因成私隙嗾奸民誣告之楠疏下法司田仍給軍官許復職景州安陵鎮巡檢程景貴獲太監李曇私鹽被其誣奏有

旨逮解楠抗疏辨明景貴獲免復巡按雲南時議大禮大小臣多得罪楠疏言近得邸報九卿大小衙門侍郎何孟春等為桂萼等議更典禮跪門進諫陛下震怒將學士豐熙等拿送鎮撫司用刑打問或

遣戍或黜為民又捶楚之酷多有死於非命者遠方傳聞不勝驚駭恭惟

陛下入繼大統以

孝宗為所後之親當時廷議者非一人雖陛下亦自謂禮當如是不可易矣自張璁倡為異議桂萼席書方獻夫輩和之以致紛紛至今竊惟羣臣跪門叫呼心主忠愛情出迫切固非不忠於陛下今或鞭扑致死或削籍或發充戍不已甚耶璁輩排正議竊美官上激九重雷霆之威下貽舉朝縉紳之禍所議之禮未足慰

二帝在天之靈而號痛之聲先已徹
九廟之內臣愚不意

聖明之世屢見以忠諫而獲罪也伏願

陛下虛心詳察速降睿旨悉復豐熙等官仍查死諫
之臣重加優恤庶幾收人心於既失綿國祚於無
疆疏入

上震怒逮赴京杖四十下詔獄削籍為民六年以天
變修省量與一官起吉水教諭尋陞崑山知縣顧
相鼎臣邑人也楠絕無所周旋稍遷至南寧知府
竟不大用乞致仕歸家居十有八年構祠堂增祭

田裁自櫛文作家規校年譜遺示子孫以壽終

林同字宜正晉江人舉弘治辛酉鄉試歷官縣學
教諭府學教授懼兩浙轉運判官分司永嘉永嘉
多宦豪善兼併隱射為利治鹽吏相沿姑息無敢
詰同疏言鹽場疆界不均竈丁不實大為窮下戶
病宜亟經正審覈凡四上得允下鹽司為令窮下
戶稍稍生息嘗部解鹽銀至太倉除允邊如數外
積羨銀千餘從吏謂例屬解官同曰本官銀也何
例之有遂白貯諸部帑大司徒梁材素廉介亟稱
同永嘉沙城之役執政張璉意也李御史布其意

下同議同度土工所費不貲又沙城善啣難就召
父老詢之曰謂沙城使者左不便者右衆咸右同
因持議忤御史意御史使溫台二郡吏雜議之以
搖同同持益堅遂疏乞致仕買舟徑歸沙城事亦
竟寢同體羸口訥而節槩健勁論義理政事率中
肯綮里居薄田數畝家徒四壁課兒孫讀書而尤
約以義方構祠堂修譜牒閭閻者質一言而解
時與村童野老杖屨談民風農事鄉之人忘其為
鄉大夫也足弗躡城市所著有正學錄龍峯遺集
龍峯其別號也

蔣孔煬字君和晉江人正德甲戌進士初任通州
知州甫下車問民利病州有宣家港度其地勢宜
田顧謂邑耆老此地棄之則荒蕪湫溢以畀鮑鮒
用以畚帛其中則上益縣官芻輓而下可足百姓
倉箱何百餘年來見不及此因力請諸當道得不
急贖緩佐以已俸墾之功就得良田可二千畝通
人至今賴之語具通州志中陞南計部轉北比部
投檄歸家居建祠堂而大宗小宗皆立祀田與旁
派子姓輪取尤酷愛其第所有田宅貲產咸割其
半以畀至今廬舍猶稱觴同堂此視昔賢取其薄

瘠似較爲難者嘉靖甲辰乙巳歲大侵飢殍載道
孔煬倡里中縉紳有力者輸直于開元承天二寺
煮粥賑施三十餘日一時賴以全活者數千命其
本宗叔姪弟昆毋論老少每日授糧一升至於
姊妹姑姪適人貧乏者所授米亦如本家之數里
中久久猶侈談其事

蔡潤宗字克昌晉江人好古力學作止起居終日
儼肅受蔡文莊易教轉授生徒學者師之尚書黃
光昇蔡克廉吏部梁懷仁傳夏器其最著也領嘉
靖乙酉鄉書除餘杭令節約里甲勸民務孝弟力

田刻四書講章易學正言以教諸生左遷寧國教
授未幾擢南京國子博士以父憂歸服除補壯出
爲建昌府通判尋稱老乞歸杜門養恬家無擔石
充然自得不屑求人亦不肯受人憐足跡未嘗及
郡邑庭監司守令往往造其廬而禮焉間一出接
終不及門報謝士大夫益以此重之

黃偉字孟偉同安人性敏而慤貌古心淳登正德
甲戌進士授刑部郎治獄情法旣得則執不可奪
廼求道南四先生書邈穎昌授受微旨以朝夕自
勵凡世好一無所嬰其心嘉靖初應詔陳九事首

論敬德必親賢儒遠近習論輔弼必任老成去軟
熟論節用必自裁減貢獻始除剝民巨蠹必革鎮
守他如選臺諫重守令養人材明職掌正憲體率
中治機出守南雄明禮教去淫祠罷不給之徵禁
晝遊之女介直敢爲無所顧忌不以升科困羸氓
不以官稅入私帑不以非禮阿上官甫三月遂疏
歸老稚渡留不可得吏部改授松江權貴有啣之
者或勸一謁以釋竟不往迺復稱疾歸自是累遷
不起日惟以養親講學正家法化鄉閭為務戊戌
泉大飢臺察請偉尸貸事偉旦暮區晝食寢幾廢

必欲無一人遺無一刻滯無斗金濫及以是殫神
畢力疾作而卒

陳琛字思獻別號紫峰學者稱爲紫峰先生自蔡
文莊公以理學教人由塲屋之業引而入聖人之
道琛生去文莊公稍後一日文莊得其文於故長
史李聰所嗟異久之聰引琛稟學於文莊文莊語
琛曰吾所發憤涵泳而僅得者以語人常不解不
意子皆已自得之今盡以付子矣文莊督學江右
請琛偕行教其二子歸而設科學宮之傍與郡城
月臺寺四方從學甚衆琛資稟朗邁於世情無所

倚涉閉戶獨學不苟同於人讀書每沉潛玩索能得意於文詞之表筆力光動流轉不可端倪語淺而根諸深語深而敷諸淺枯能使之潤離能使之合約能不遺肆能不亂而卒歸於性命道德所著述以授門徒有四書淺說易經通典二書猶以為未至欲超脫於塵壒之外細論顏子之所謂彌高彌堅者正德丁丑會試考官編修尹襄持琛卷語主考靳大學士貴以為造詣精深不墮舉業蹊徑反覆數遍曰必出陳白沙門下或師蔡虛齋他人不能為此釋褐授刑部主事謂古人仕不廢學剖

決紛瑣之暇必沉涵經史以養道心德意而時出其意於法律拘束之外庶官以秋名而春自在以母老乞改南得戶部差監淮安舟稅凡小舟不入閘者悉弛其征人大稱便而淮安漕院微欲有所干撓琛曰若論王道之純則鈔關可無設今正額不虧而多取贏餘以為功豈所忍為其人愧屈尋轉吏部考功郎又力乞歸養嘉靖七年以大臣薦詔徵用辭又一年即家拜貴州按察提學僉事俄復改江西皆辭不赴家居掃却一室偃仰其中靜觀天地萬物消息之變以及古今興衰治亂世態之

炎涼向背或適然發咲或喟然太息不以告人人亦莫能測也興趣所至時或縱行田野間與農夫野叟談敘風俗舊故桑麻節候為樂發為詩歌往往自在脫灑與人交藹然可親愈久而人愈欽慕文莊公既沒所謂無愧師門者琛一人而已歸養若干年母以壽終琛年幾六十執喪如禮後十一年亦沒病革所居後潮沙木至士大夫聞之識與不識咸為歎惋有司特祠之學宮張襄惠岳論其人曰有避世之深心而非玩世無道學之門戶而有實學世稱確論子敦豫志行醇飭能傳其業

史于光字中裕晉江人家貧勵志讀書事二親竭力父喪稱家惟致哀戚而已居近江濱偶江水溢漂父柩于光奔而緣之柩挂于樹獲救免人以為孝感既葬領正德癸酉鄉薦不赴春官或促之行曰仕不及親奚亟為丁丑登進士第選為庶吉士未幾疏疾歸歸五年起為吏科給事中時議大禮于光疏不報又以疾疏歸凡前後家居者九年居必謝煩囂處幽寂博極群書補策學衍義之所未備尤精意於易作易經正蒙便學易者俾有從入蹊徑雖寒暑夜不息燈思有得處即起而書之家

寔且極恬然不自知也形癯甚而手不釋卷所親
或况以關說事輒正色拒之終始寔極無悔復起
官赴京同考會試尋卒郎中宦囊罄無以為歛張
襄惠岳為經紀歸櫬于光在顯秩十有一年至妻
子無以為居食貧而無怨蓋有以自得云

林希元字茂貞同安人正德九年進士授南京大
理寺評事

世廟登極條上新政八要大畧言君道在勤正學親
正人而息中官機務罷中官鎮守尤所以清政本
塞亂源又言臺諫諸臣默默於徃時嘒嘒於今日

竽瑟混聽非葑奚米宜考覈以清言路接本進士
周祚等疏言頃來章奏紛紜無如希元所陳者乞
留神省覽見之施行下所司議議上

上優詔嘉納焉是時希元名動兩都忌者側目會以
議獄事忤寺卿陳琳南京御史戚雄等疏論之降
泗州判官復以不屈當路棄官歸大臣交疏薦之
起為寺正擢廣東鹽法僉事尋改提督學校其條
訓多士務在闡釋經傳敦崇古典陞南京大理寺
丞秩滿留內時遼東軍凌辱撫臣希元抗疏極言
姑息之弊忤

旨謫欽州知州居久之會安南不貢

朝廷方議征討擢希元海北道兵備僉事而希元主必征之策督臣與異議竟罷歸希元慷慨鯁直有俯視流俗擔當宇宙之氣而才識亦練達

世廟罷鎮守中官悉歸內監自其一疏啓之而安南揣揣歸命還我四峒亦希元之議足以奪其魄焉言雖不用何至并廢其身可慨已家居手不釋卷所著易經四書存疑皆足羽翼考亭學者師之張岳字維喬惠安人祖萍鄉令綸父英德令慎皆以學行聞岳生而端凝長好學博極群書自□□

賢豪正德八年鄉薦第一十二年成進士授行人

殺皇帝寢疾豹房岳疏言自古未有人主寢疾獨宦者侍宜令九卿臺諫輪直嘗藥已

上南巡同諸司疏諫下獄廷杖謫南國子學正嘉靖初召復行人陞右司副南武選員外祠祭郎中制歸服除補主客卽時

肅皇帝方定禘禮議所自出之帝張相孚敬欲遷合當之岳言于部曰是不可強知獨以皇初祖設位必有得姓受氏之人儼然陟降者張不聽議上御批署皇初祖位如岳言時孚敬首以議大禮結

上知不謂見出岳下甚忌之欲羅致門下不可出僉
廣西學憲復改江西坐在廣西時不行選貢新例
謫廣東提舉乙未轉守廉州蒞郡三載不取珠池
一珠安南久亂不貢朝議將討而郡縣之岳言遠
夷相攻殺不足為出兵勞弊中國具疏陳狀通政
司却不以聞則遂治兵食立營堡計王師所從入
道里之詳事有緒矣會擢浙江提學副使尋擢其
省叅政而莫福海人款關言往張廉州安在是欲
以恩信撫我何可忘於是叅贊毛伯溫奏還岳廣
東為畫所以受降之策甚備安南平詔賜金幣陞

俸一級是年秋督府檄征崖黎涉海南攻羅活抱
萬抱宥諸洞破之崖多李德裕子孫岳遴其質美
者數人給衣巾俾翔望習禮崖庠其子孫以祖遺
玉帶獻岳書李德裕傳并帶慰而還之詔再賜金
幣加俸壬寅擢拜僉都御史撫治鄖陽旋改命江
西屬歲饑奏留京折銀五萬兩又請折正兌改兌
米數十萬石民饑而不傷貴溪相言治生塚藩司
議廣信七縣各措千金岳曰將範金為榔乎縣百
金足矣分宜相高奉賜建延恩閣岳批牘與千金
所司相顧訝少重復請益岳曰是非相君意况供

費如式實奉明旨批卻之言與高無以咎也俱陽
為謝乙巳陞右副都御史督兩廣軍討封川融懷
馬平諸僮悉平之陞兵部右侍郎兼僉都御史賜
銀幣召為刑部右侍郎御史奏留不果行又明年
平連山僮復召為兵部左侍郎尋遷右都御史掌
院事未幾湖廣麻陽鎮草貴州銅仁諸苗相煽為
亂而龍許保吳黑苗稱亂首當事者僥倖苟安曲
意為撫岳奉命以右都御史總督湖廣川貴軍務
開府于沅聚錢穀飭戎伍更易將帥疏言壹意征
剿苗始恐則喉黨四出寇印江石阡思州幸

朝廷以失利去岳而罷兵詔書切責最後奪一官岳
持愈堅以計獲其內訶田應朝斃諸獄集土漢兵
檄諸將分道進剿前後斬獲以數千其頗逃匿山
箐悉諭降之苗既衰破震懾相繼擒首惡龍許保
吳黑苗以獻三方遂寧功未及奏而卒後本兵列
上其功贈太子少保謚襄惠蔭子賜祭葬皆中降
特恩方鎮沅時邊臣競餽遺用事者以自全而岳
以持正為所扼有功常薄其賞微失利輒被譴或
諷之少貶岳曰無以為也寒骨稜稜第欠馬羊一
張其他吾分自定人如之何卒先四月有大星殞

于東南云岳長身玉立弘毅淵默平居寡言笑天
性孝友篤於人倫學宗程朱必以持敬窮理及躬
實踐爲務凡一切譚說性命指爲籠罩排之甚力
爲行人時嘗遇浙江與王新建講明德新民之旨
新建不能屈揖而去之官輒所至乃心國事絕不
爲身家利害謀廉柳沅德慶諸州咸有專祠爲文
氣象宏裕法度森嚴出入董賈韓歐而不屑以文
士自命舊志稱德義功烈古稱不朽而罕有兼者
兼之惟張公可謂一代名臣所著有聖學正傳更
定禮記恭敬大訓載道集宋名臣奏議各輔事業

歷代兵法小山類藁惠安志凡若干卷皆有補於
世教第峯庚戌進士有志行宮四川僉憲子宓慶
遠知府廉正有執窩領薦順天孫迎萬曆乙未進
士

Handwritten marks at the top of the left page, possibly bleed-through or a signature.

Faint vertical text on the right page, likely bleed-through from the reverse side. The characters are difficult to decipher but appear to be in a traditional Chinese script.

